

東  
華  
續  
錄

臣朱壽朋敬編

臣汪錫增恭校

六月癸巳朔雨○張曜奏溜河發源於臨朐縣西南諸山夏秋間河水暴漲衝擊自西至東由樂安  
歸光縣境匯歸羊角溝入海前因樂安東鄉燕姓等莊私挖桃花溝溜河自南至北光緒元年經御史馮  
爾昌奏奉 上諭溜河口岸關繫居民田廬豈容奸民私挖著丁寶楨查明該御史所奏情形飭令該府  
縣將桃花溝等處口岸照舊堵築並出示嚴禁如有不法棍徒再蹈前轍卽行嚴拿究辦等因欽此查舊  
卷前樂安縣知縣徐樹稟復稱以燕家莊具結請在桃花溝築土壩中留兩孔並挖修富民河預備兩河  
以疏積水奏覆在案茲據齊萊青道盛宣懷督同工賑局紳董屢作霖署樂安縣知縣劉昌祿查明所築  
土壩毫無形迹富民河久淤高於平地且桃花溝地勢卽使築壩開孔盛漲之時營利者請開被害者請  
閉實難兩全故當時議而未築以致桃花溝所引溜水直衝迤北數十村莊田廬年年被淹而獲淤田之  
利者僅有溝旁之燕家數莊又上年溝西莊民私挖小西口釀成人命西北各莊俱受水害該道此次駐  
工各莊紛紛稟請將桃花小西兩口迅速堵築以除民害併請勘下游溜河故道已淤近三十年大溜皆

由東河口迤東至鉅定湖入羊角溝河勢甚直似應順水之性量爲挑挖准其留爲溜河尼因正道以後再行查看情形能否籌款酌興水利總期勿淹民田爲主臣查樂安縣民私挖溜河兩口引溜北趨誠如馮爾昌所奏營利者甚少受害者甚衆自應極其輕重仍遵光緒元年諭旨將桃花溝堵築並將小西口新掘私口一律堵築俾後溜河大溜仍向東由鉅定湖入海並飭令地方官嚴防偷挖如有再蹈前轍立拿照律嚴辦以懲強暴而安善民下部知之○甲午兩○馬丕瑤奏全州龍神火神靈應請頒匾額得旨前已諭令各直省按季彙題卽著遵照辦理○楊昌濬奏順奏查有青海管轄玉樹各族番衆屢被四川屬之德爾格土司等欺凌勒索以致玉樹番民困苦難堪迭次呈懇查辦經前辦事大臣薩凌阿據情具奏欽奉諭旨飭下成都將軍四川總督駐藏大臣遴選妥員確切查明分別懲治以弭後患等因欽此本年正月十九日准四川督臣劉秉璋知會前來商由川甘兩省各派妥員約於德格玉樹適中之地互帶所轄番屬彼此覈訊以期迅速清結適前辦事大臣薩凌阿丁憂回旗未及核辦由代辦大臣事署西寧鎮李良穆轉呈到省經臣昌濬派委副將銜署巴燕戎格營游擊張鼎雄率帶弁兵克期前往奴才奎順接印後馳赴西寧照案辦理並派筆帖式咸斌隨帶兵丁書識會同前往茲據張鼎雄等稟稱遵於五月初八日起程由丹噶爾出口取道前進並帶馬步弁兵數十名以昭慎重奴才當飭該員等謹慎

辦事嚴約兵役毋許需索滋擾凡玉樹各屬案件務須相機辦理妥速竣事以期仰副 朝廷慎重邊防  
懷柔遠人之至意所有應需官兵騎馬匹口食等項銀兩由 臣 昌濬飭司照例支給分別轉發以資應  
用報聞○馬丕瑤奏廣西水陸各防營上年經 臣 奏明分別撥歸鎮道各員督率以專責任其柳州河面  
之水師右營照會柳慶鎮總兵兼統分駐柳州慶遠思恩潯州等府屬之陸路防營派右江道員節制調  
遣在案查江右道所屬大半皆山深箐密伏莽易滋在昔為著名不靖之區時多刼掠之案自派右江道  
張汝梅節制陸路防營力求整頓督飭各營會同地方官嚴密巡防勤加緝緝迭獲積年稔惡匪徒稟明  
懲辦轄境日臻乂安水師與陸路防營原相維繫若將柳河水師右營一併撥歸張汝梅兼統水陸調度  
尅期應手捕務更為妥速得力益抵肅清在該鎮道同丹共濟本無隔閡之虞而水陸統歸一員呼應尤  
為靈便下兵部知之○乙未以江蘇候補道張翼麟協助順屬賑卹交軍機處存記並賞二品頂戴○長  
順奏朝鮮國民越界解回查辦下禮部知之○以伯都訥同知郭錫銘等簽差不慎解犯脫逃交部議處  
○長順奏教化縣生荒尚未墾齊請再展升科年限下戶部議奏○兵部奏查光緒十六年恭逢 皇帝  
二旬萬壽 恩詔內開內外大小官員各賞給紀錄二次曾經將應得紀錄大員兩次題奏予給茲又續  
行查明未經題奏之吉林將軍長順等三員甯古塔副都統富爾丹等七員候 旨施恩得 旨長順岐

元克蒙額富爾丹富魁富和雅爾堅富森布致麟均著各賞給紀錄二次○李瀚章劉瑞芬奏准戶部咨具奏廣東新定各界增設官兵額應支廉俸餉精等項數目查明再行核議一摺原奏內開所有官員廉俸吏役工食兵丁餉精均應照章支給各項經費一切未盡事宜應令開單報部立案俟奏咨到日再行分別核議等因當經移行遵照辦理去後茲據署廣東布政使王之春會同署按察使德泰詳稱除營汛兵餉及地畝錢糧一切未盡事宜另行核議詳辦外查欽州每年額支養廉銀六百兩今改升直隸州管轄防城縣政務較繁自應酌增以資辦公擬請比照羅定直隸州年額支養廉銀一千兩除該州原有養廉銀六百兩外計增給銀四百兩其防城縣係屬添設擬請比照羅定州屬之西寧縣每年額支養廉銀七百兩防城縣江平司巡檢亦係添設之缺應照本省各巡檢每年額支養廉銀六十兩此外欽州林墟司巡檢係靈山縣林墟司巡檢移設防城縣縣丞係欽州州判裁改防城縣典史係欽州防城司巡檢裁改防城縣若昔司巡檢係欽州如昔司巡檢移改查州判與縣丞均每年額支養廉銀八十兩典史與巡檢均每年額支養廉銀六十兩數目相同毋庸增減以上州縣佐雜各員應需養廉除裁改移駐各缺原有額設養廉分別移撥支給外計增欽州直隸州知州加給養廉銀四百兩防城縣養廉銀七百兩共銀一千一百兩應請在於司庫各官養廉項下動支江平司巡檢養廉銀六十兩應請在於司庫落地稅

羨項下動支又欽州每年額支俸銀八十兩原設門皂各役四十九名工食銀二百九十四兩核與本省  
各直隸州額設俸銀相同應仍其舊該州原設民壯二十名工食銀一百二十兩鐵匠一名工食銀六兩  
亦應照舊支給以免紛更又防城縣俸銀擬照本省各縣偏俸每年額支銀四十五兩該縣門皂各役照  
西寧縣額設四十九名每年工食銀二百九十四兩應設民壯擬照本省小縣准設二十名每年工食銀  
一百二十兩防城縣縣丞係欽州州判裁改該州判原支俸銀四十五兩額設門皂馬夫九名工食銀五  
十四兩今改爲縣丞應照本省各縣丞每年額支俸銀四十兩額設門皂馬夫六名工食銀三十六兩計  
俸食各項共裁減銀二十三兩防城縣典史係防城司巡檢裁改典史與巡檢均每年額支俸銀三十一  
兩五錢二分數目相同應仍其舊該巡檢原設皂隸二名每年工食銀六兩今改爲典史應照本省各縣  
典史額設門皂馬夫六名每工食銀三十六兩計增役食銀三十兩欽州林墟司巡檢係靈山縣林墟司  
巡檢移改防城縣若昔司巡檢係欽州如昔司巡檢移改俸薪役食相同應仍其舊防城縣江平司巡檢  
係屬添設應照本省各巡檢每年額支俸銀三十一兩五錢二分皂隸二名每年工食銀六兩防城縣訓  
導移住俸銀照舊動支其齋夫門子一項查欽州原設學正一員訓導一員齋夫門子共六名今訓導移  
住防城縣應均撥訓導齋夫門子三名仍留學正齋夫門子二名工食銀兩隨缺開支以上各缺俸食銀

兩除裁改移住各缺應將原有俸食分別改撥支給外計應增添設之防城縣俸食銀四百五十九兩江  
平司巡檢俸食銀三十七兩五錢二分共銀四百九十六兩五錢二分擬請在於各屬備支經費餘贖解  
司充餉項下動支又防城縣典史不敷役食銀三十兩擬請在於司庫裁汰酌改經費項下支給遞年均  
造入添設各衙署俸食冊內報銷其裁減欽州州判俸食銀二十三兩飭令該州照數扣存批解司庫兌  
收充餉等情開具清冊詳請奏明定案前來臣等覆核無異伏乞 勅部核覆施行下部議奏○劉秉璋  
奏臣承准軍機大臣字寄光緒十七年三月十九日奉 上諭四川川東道伊勒通阿承辦道黃雲鶴著  
劉秉璋悉心察看如竟不能勝任卽行據實參奏毋稍遷就將此諭令知之欽此欽遵寄信前來等因承  
准此伏查川東道伊勒通阿前於三月間稟稱舊症增劇請開缺回旗調理等情除委員驗病外當卽專  
摺奏請將伊勒通阿開去川東道缺准其回旗調理所遺川東道一缺請 旨簡放在案至承辦道黃雲  
鶴年逾七十雖外貌猶健而神智不免就衰荷蒙 天語垂詢臣何敢稍涉遷就應請 旨將黃雲鶴以  
原品休致所遺承辦道缺川省現有應補人員例准扣留外補合併陳明得 旨如所請行○丁酉兩○  
子長興縣節烈孝貞婦女鍾沈氏等旌表○白桓因病奏請解任允之○以壽昌爲通政使司通政使○  
子年逾百齡之江西壽職黎陞望旌表並賞銀段○命麟書爲幼學官學管學大臣○魏光燾奏奉獲叛

逆盜匪請將失察之署吐魯番同知傅壽森等議處得 旨如所請行○戊戌兩○子年逾百齡五世同堂之山西五臺縣壽民王汝楫旌表並賞銀段○宮勒銘頌奏請將剿匪出力之補用直隸州徐桂芬破格錄用下吏部議奏○宮勒銘頌奏請開復記名提督李長發賞還黃馬褂下兵部議奏○諭軍機大臣等各省哥老會匪最為地方之害疊經降旨查拿並經各該督撫先後獲案奏明懲辦惟此等匪徒行蹤詭秘往往與游勇地痞暗相勾結動輒糾集黨與乘機煽亂甚至造謠惑眾潛謀不軌近來江蘇安徽湖北江西等省屢有焚燬教堂之事其拒捕逞兇搶劫衙署等案吏胥見迭出半由會匪從中主謀游手之徒相率附和以致愈聚愈多動成巨案犯事以後四散逃逸真犯十不獲一若不先事籌辦絕其根株則涓涓不患將成江河後患何堪設想著各直省督撫嚴飭地方文武隨時留心實力查緝如有訪獲會匪首犯一面嚴行懲辦一面准將出力員弁照異常勞績隨案奏請優獎但須查有確實證據不得因希圖保獎妄拿無辜致滋擾累凡地方良民有誤買匪徒保家僞票呈繳地方官者免其治罪其有向充會匪自行投首密報匪首姓名因而拿獲者亦一律宥其既往准予自新該將軍督撫務卽出示曉諭俾眾咸知總期嚴懲首要解散餘從以除奸宄而安良善慎勿養癰成患貽害地方是為至要將此通諭知之○己亥予故署膠州知州許祺身政績交國史館立傳○升泰奏奴才前將邊務習後委員黃紹勳張昉由



藏起程日期附奏在案茲據該員等稟稱沿途大雪封山未得暢行抵仁進岡行營始准赫政函稱印度  
派定辦理後三款保爾不日即將到嶺會議該員等聞信趕程前進於二月二十六日抵嶺當與保爾赫  
政彼此通謁旋由赫政遞來譯出印度完結後三款意見十四條清摺一件等情具稟齎送前來奴才詳  
加查核多與上年原議不符當即傳諭商上并派員開導堅執不肯遵依所可慮者彼族違更原議致啟  
猜疑不獨此後事機諸多不順且恐番衆有所藉口即原議通商各節亦復窒礙難行未敢操之過嚴自  
應準情酌理逐條議覆開具清摺飭令該員等由赫政譯交保爾俟其具覆再行酌辦並飭該員等於善  
後二字顧名思義徐與磋磨從長計議總期藏印相安以仰副 聖主撫綏中外之至意下所司知之○  
庚子松榕奏本年四月間據山東運河道耆安稟稱攜帶委弁工役及挑河銀兩親赴十字河查勘挑工  
三月二十七日戌刻突有匪徒數十人各帶洋鎗入船行劫劈開銀鞘搶奪關防扭傷該道督商當經該  
道強將關防索回又被打傷隨從夫役及水卒共五名搶去零星衣物多件分批奔竄等情奴才因係鄰  
省重大要案即飛行照會淮揚徐州各總兵官並飭各防營不分畛域一體跟蹤嚴拿此案匪犯務獲究  
辦旋據徐州鎮總兵陳鳳樓稟稱竊奉照會當即選派幹練營哨嚴密查拿旋據銘軍馬隊哨官副將王  
鳳如練勇管帶副將符得先稟稱四月二十三日據眼線報稱姚家樓西有著名匪首張清雲又名麻亂

紳號水軍都督匪徒多人在彼潛匿該副將等各帶馬步隊伍前往四面兜拿該匪膽敢對敵開放洋鎗  
練勇高奮奮勇當先被擄列命該副將等登時率隊猛撲將張清雲擒獲餘匪奔逃天時將晚昏黑未能  
深追查訊該匪首有賊船數隻向在南陽湖一帶肆行搶劫洵屬著名巨匪在營供認山東運河道被劫  
一案該匪在內行搶得贓分用不諱當經奴才批交署徐州道桂嵩慶嚴行訊辦在案嗣又據該總兵續  
稟營帶飛騎營馬隊參將李芳嶺帶銘軍馬隊都司陳萬金巡緝至鄭家集地方會同西路汛把總陳  
景池之駐防新兵縣捕於馬溝坡圩內拿獲山東積匪殷茂榮一名亦供認同夥多人搶劫運河道衣物  
銀兩均分屬實又於姜莊地方訪獲匪犯姜慶雲之工人劉茂軍一名並起出贓物多件各等情正在批  
飭訊辦間又據該總兵會同署徐州道桂嵩慶稟稱匪犯殷茂榮已在銅山縣供明聽從匪首姜慶雲結  
夥四十餘人行劫運河道得贓不諱其上盜情形分贓數目歷歷如繪夥犯亦均有住址已由該道會會  
山東臬司運河道轉飭滕縣迎提歸案訊辦並一面囑緝躡緝逸犯其先獲之張清雲在沛縣僅供認行  
劫別案與在營所供不符難保非狡供避就而查核殷茂榮供詞既稱係姜慶雲爲首姜慶雲三字與張  
清雲字音相近自應提道嚴訊各等情前來查此案關繫重大殷茂榮一犯供認明確自無可遁張清雲  
一犯與姜慶雲字音相似難保非借此飾混冀逃法網劉茂軍一犯既認係姜慶雲工人亦應一併訊究

理合陳明得 有據奏拿獲鄰境要犯緝捕尙屬認真卽著研訊確供仍迅拿逸犯毋任漏網餘依議○

德福奏據熱河總管祥煜咨據苑丞毓純吉祥等稟稱喀拉河屯倉廩守門堆撥房屋並周圍牆垣滲漏

坍塌米無所存儲前於光緒十二年間修復熱河 宮倉廩座之時喀拉河屯倉廩雖有滲漏情形彼

時多用木植保護尙抹嚴密尙能支持未經黏修上年雨水連綿情形尤重且廩座被米氣薰蒸大木俱

多腐朽兵精攸關實難稍緩查此項工程殊非尋常黏修可比若歸總管衙門修理實屬無此款項相應

咨會籌修等因前來復據承德府取紹詳稱熱河郡街向有 城隍廟一座始自乾隆三十七年創建每

歲春秋由熱河都統率領地方官致祭每月朔望前往拈香歷久遵行在案查廟內前殿後殿均係供奉

神像殿簷脫落滲漏不堪每值大雨 神像供桌偏處皆水左右穿廊鐘鼓二樓旗桿牌坊山門牆垣

因歷久失修均有坍塌滲漏情形又兼上年連旬大雨以致情形愈重祀典攸關實屬礙難從緩並據印

務協領穆哈廉等稟稱鎮總管操演處與武列河相近地勢最窪因上年石礮衝坍水由缺口漫溢致將

該處牆垣衝倒收存軍械各房被水浸灌等情先後稟請擇要黏修各等情前來當經奴才率領道府協

領親往城隍廟及鎮總管操演處周圍詳加履查該道府協領所呈俱係實在情形並飭派佐領忠莊前

鋒校存祿佛爾格稱會同總管衙門委員前往喀拉南屯倉廩詳細查勘去後旋據聲復與該總管咨稱

情形無異查喀拉河屯倉厥係存儲該處駐防官兵俸餉米石之處似此坍塌傾圮更無儲米之所城隍廟爲一方之保障載在祀典勢難任其坍塌鎗礮營操演處爲陳兵之所一切鎗礮各項技藝藉資習演並存儲軍械鉛彈等項更宜嚴密方足以昭慎重以上工程在在均關緊要若不及時修理轉瞬入伏一經大雨難免不無傾圮坍塌之虞需款更鉅當經飭派委員率領工商據實勘估用昭核實並由奴才極力撙節以免浮費茲據該員等分晰開單稟覆前來奴才復經詳查尙屬核實惟有仰懇 聖主恩施俯念各工緊要准令籌修如蒙 俞允恭候 命下之日起緊擇吉興修所需工料一切銀兩由熱河道庫人役工食減成旱河備賞等項下動撥以資工需統俟工竣後再行造具清冊咨部核銷得 旨如所請行○辛丑 上諭 奉先殿 壽皇殿行禮○李鴻章奏委員赴張家口外選購戰馬請飭部給票免稅得 旨如所請行○壬寅以沈源深爲兵部右侍郎○以何乘鼐爲四川北鎮總兵○本貴等奏查五城請棟正副指揮時遇人數不敷列棟由吏部將候選通判借棟正指揮候選知縣借棟副指揮到城差遣委用惟此項借棟正副指揮祇准差委不能借補城缺而西北兩城事務繁重辛勞倍甚此項人員到城以來奮勉趨公於委派一切事件認真辦理毫無貽誤既不准其借補城缺似應量予變通以資鼓勵查現任正指揮三年俸滿以同知升用副指揮三年俸滿以知縣升用均於引見後准其呈請分發發

學省分歸候補班補用等公同商酌此項以正副指揮借據到城差委之員擬請比照實缺正副指揮三年俸滿升用之例加倍核計以到城之日起實扣足六年如果當差無過辦事勤能卽由臣等出具切實考語仍歸本班保送各以通判知縣本班呈請分發發掣各省歸候補班補用以昭激勵其本班正副指揮據發到城之員不得援照辦理以示區別 上諭巡視中城御史本貴等奏酌擬變通司坊官補用章程著該部議奏軍併發○松森奏奴才衙門現辦哲里木盟副盟長一缺奴才詳核例案每多兩歧如以幫辦盟務開列在前而幫辦盟務有非親王郡王所兼者則與俱按品秩之例不符如專按品秩則前辦成案有論幫辦盟務而不論品秩者有以幫辦盟務而仍論品秩者奴才以例案既不相合未便依阿兩可且辦副盟長之缺又無將幫辦盟務不論品秩開列在前明文是以前後辦理未能畫一相應請旨嗣後遇有副盟長缺出應如何繕單請簡之處恭候 欽定敬謹遵行 上諭松森奏理藩院現辦哲里木盟副盟長一缺例案不符且例無幫辦盟務不論品秩開列在前明文各等語著恩承等查明詳晰具奏○命崑岡巴克坦布承修 壽寧宮工程○岐元劉秉璋升奏等欽奉光緒十六年十月十一日 上諭長庚奏酌議贍對替後事宜請飭妥籌辦理一摺等因欽此當由臣升奏欽遵恭錄譯行第穆呼圖克圖去後旋據稟稱以該升任將軍蒞任日淺情形未悉懇請變通辦理以免窒礙等情前來竊查

該升任將軍長庚條奏各節或做繼於先時或稍制於事後法良意美洵久安長治之規當經臣升泰飭令遵辦旋據原覆以原奏內稱各節及章程八條稍加酌議尚可遵從惟臬對番官歸打箭鑪災賑文武兼轄一層萬難遵依推原其故蓋以臬對地方係於同治年間設給達賴喇嘛派堪布管理一經川員兼轄有失顏面且恐法立弊生營繕過多其中不無擾累情事查原奏內稱以臬地距藏過遠鞭長莫及控制為難若欲收回疆土永斷葛藤不惟於情不順抑且其勢不能擬以兼轄字樣誠屬調劑苦心蓋亦深知其難也詎商上會議紛紛其票不肯遵依復經臣升泰派員開導酌擬番官肆虐准臬民赴鑪災具控平日無事仍專歸番官管理以冀陽避其名陰收其權乃商上以為准其具控即已暗同歸川曉曉置辨不已竊維治夷之道簡易為先節目不欲過繁而約束不可稍寬前督臣喀爾璘請以臬地與藏亦深維以夷治夷之義免滋繁擾觀歷以至於今臣等核度情形以為番官肆虐聽民有所控訴則其情得伸即不至激而生變商上既經執拗不願歸鑪災兼轄操之過感恐亦不能相安應請以後番官准聽民向吐藏大臣衙門具控從嚴參辦如以道途遙遠請查照廓番遇有稟件交定日守備轉遞之例其呈詞即交距臬對較近之江卡守備轉遞不拆不看倘該守備敢有積壓拆閱查出一併參辦庶番官斂貪殘之跡聽民無屈抑之冤實於永遠相安之道大有裨益已由臣升泰將該升任將軍條奏各節暨酌擬應禁苛

政八條稍加更定一併譯行該呼圖克圖取其遵依圖記切結並俟具奏完案後再行發給兩造斷牌並於瞻對官寨處所刊碑勒示永遠遵守得 旨該衙門知道單併發○岐元劉秉璋升奏委長庚前奏嚴禁番官勒索玉樹番族並開導商上調除兵費一片臣等欽奉 諭旨一併酌核奏辦等因當由臣升奏恭錄譯行第穆呼圖克圖欽遵辦理去後旋據稟稱以昔年各土司受瞻對工布朗結蹂躪幾於不保疆土經商上派兵剿辦邊境遂以牧安賠累兵費三十餘萬嗣因瞻地 賞歸達賴喇嘛與各土司約守官寨每年按納兵費不獨玉樹爲然一旦調除各土司紛紛效尤有壞成規礙難遵辦等情前來臣升奏再四開導以商上於各土司及玉樹番族雖有救護之恩助納兵費不爲無名但玉樹番族異常窮苦查該商上稟稱每年應收玉樹兵費銀一千二百兩爲數甚鉅該番族何堪重累卽無德爾格特從中串弊已屬不支復經派員勸導至再三始據出具圖記切結將前項兵費每年減去銀一千兩按年照納兵費銀二百兩並於結內聲明此後各土司不得援以爲例推原其故不肯遵然調除者蓋亦恐此端一開相率效尤於該商上成規諸多窒礙臣等酌加核度此項兵費既減去十分之九於玉樹尙無重累如恐德爾格特串同番官藉勢欺陵則此項每年應納之兵費銀二百兩請 飭下青海大臣轉飭該屬番目每年徵收按時專派頭人到瞻上納逾時不納始准番官派人往收倘敢需索查出從嚴參辦至德爾格

特係屬川疆應由臣岐元秉璋檄飭辦理贖務委員前往查究欺陵前案並嚴飭德爾格特土司不得串同番官藉勢欺陵玉樹番族另行具奏完案得 旨如所請行○癸卯恩承鳳鳴慶福奏光緒十七年六月初十日由內閣鈔奉 上諭松森奏理藩院現辦哲里木盟副盟長一缺例案不符且例無幫辦盟務不論品秩開列在前明文各等語著恩承等查明詳晰具奏欽此欽遵等查則例內開 簡放盟長將副盟長及該盟內管旗之漢土貝勒貝子公與不管旗之王公等除年未及歲者毋庸開列外其管旗之扎薩克王公等俱按其品秩並接印任事之年分開列其不管旗之王公等亦按其品秩並及歲食俸之年分開列均註明年歲繕寫清單附摺進呈請 旨簡放一員其 簡放副盟長與此例同等語等細釋例文原不能填碎詳備且係一二語即可包括無窮所以請 簡盟長既將副盟長開列在前次則論管旗品秩開列至應請 簡副盟長即將幫辦盟務開列在前管旗品秩在次復查例辦成案同治二年七月請放卓索圖盟副盟長單開幫辦盟務喀拉沁扎薩克鎮國公銜頭等塔布囊德勒格爾在前其次多羅達爾漢貝勒三巴勒諾爾贊等五員同治九年請放卓索圖盟副盟長單開幫辦盟務喀拉沁扎薩克鎮國公烏凌阿在前其次輔國公銜魯布忠奈一員同治十年七月請放哲里木盟副盟長單開幫辦盟務卓哩克圖親王濟克登旺庫爾賓圖郡王西哩巴咱爾等二員在前其次多羅郡王阿勒坦鄂綽爾



等十員臣等此次辦理請 簡副盟長卽遵照例文及辦過成案開繕清單請 旨簡放臣等謹稿後卽  
令承辦司員持呈例文成案回知尙書松森閱費往返數次稽延多日始終不盡是以告知松森難以積  
壓定於初十日具奏臣等斷不敢有違例案率意具陳 上諭昨因松森奏理藩院現辦哲里木副盟  
長一缺例案不符當諭令恩承查明具奏茲據奏稱此次請簡副盟長係遵照例辦成案開繕清單等語  
幫辦盟務差使正在副盟長之次總辦本盟各旗事務與專管一旗扎薩克相較自應開列在前況有歷  
辦成案何得以例無明文妄議更張恩承照案開列請簡並無不合松森固執已見率行單銜具奏殊屬  
糊塗任性理藩院尙書松森著交部議處○沈應奎奏准吏部咨稱所有臺灣清賦全功告竣出力各員  
等請獎仍應嚴加刪汰一摺竊連知照原奏內稱潘成清等一百九十二員總理賦局及派辦臺灣臺南  
臺北各府清賦事件尙有應辦事宜至林汝梅等一百九十四員並無勞績應全行刪汰潘成清等一百  
餘員仍應奏明請 旨飭下臣等將出力稍次之員嚴加刪汰等因於光緒十七年三月初三日具奏奉  
旨依議欽此欽遵咨行前來前據 劉銘傳未及核辦郵事移交到臣自應遵照辦理何敢再三瀆請  
惟查臺灣自隸版圖二百餘年糧賦未經查丈嗣因奉 旨改立行省一切開山清賦等事均係創辦前  
據 劉銘傳渡臺後於光緒十二年間奏請開辦清丈各屬向無魚鱗冊籍勢非一時所能竣事前經奏

明先行編查保甲就戶向糧並請嚴定賞罰以求實效欽奉 諭旨卽著督飭各員紳認真辦理出力人員准照異常勞績奏獎等因欽此仰見 朝廷獎敘勤勞在事員紳無不感激思奮踴躍圖功計至十五年十二月給單一律完竣實計正額之外每年溢出銀三十六萬三千三百餘兩以向未清丈之地盡行查出歲增賦課數十萬兩之多籌兵籌餉皆行取給於此裨益實非淺鮮時僅三載將一州二廳十一縣清丈事宜迅速告竣不得謂無勞績可稽部臣以保舉人數過多議駁不知臺灣各屬自數十萬甲至十數萬甲不等豈數十人所能辦竣劉銘傳前經奏明逐戶清丈之時須設立清賦總局督率辦理原非就地向糧遠能戡事也凡填給丈單繪圖造冊科算錢糧田畝辦理丈田給單稽核冊案事創始在在需人深賴各員紳不辭勞瘁得竟前功計每屬僅保獎二十餘員或十餘員合則見多分則見少實非人浮於事前因各屬開保人數眾多已將出力稍次之員核實裁汰所有奏獎各員紳均係實在出力之人其道員林汝桐等一百餘員祇照尋常勞績請獎非敢概邀優賞僅將同知潘成清等一百餘員遵 旨按照異常勞績請獎且祇就各員本職升階酌保不敢過優至部臣原奏所 謂各省分人員因何徑赴臺灣差委均應照章撤銷等語臣詳加查核原保之外省官數十名皆係久隨前撫臣軍營差委或投効到臺就例報捐並未到省間有他省候補數員當時因奉委赴臺及捐資出省來臺投効因其地方情形熟悉

是以分派各屬清查地畝著有實在勞績並非率行離省前經造冊咨部聲明有案亦與臺灣歷次保獎之案相符臺地孤懸海外人皆視為畏途此次在事各員勤苦三年始終奮勉均係應予獎敘實屬無可刪減茲既准部咨令嚴加刪汰惟當於無可刪汰之中認真酌核將出力稍次者刪減若干名此外實係勞績卓著無可再刪謹繕清單恭呈 御覽合無仰懇 天恩俯念臺灣清賦事屬創舉歲增鉅款洵為久遠之利將所保各員 特降諭旨允准以示信賞而昭激勸臺灣大局幸甚微臣幸甚得 旨覽奏均悉所請開復各員著該部議奏餘均照所請獎勵單併發○予捐設義學之貴州民人柳長遠建坊○乙巳卞寶第奏琉球國遭風難民漂至臺灣照例撫卹下部知之○張之洞奏委員赴張家口外選購戰馬請 飭部給票免稅下兵部知之○頒發慶額奏查塔爾巴哈臺屯防副將協標漢隊勇營一千五百員名並地方一切善後事宜遵 旨定期於光緒十七年正月初一日移交甘肅新疆巡撫接管業經叙才恭摺奏明並咨會護理甘肅新疆巡撫布政使魏光燾轉飭借補塔城屯防副將張懷玉迅赴本任以專責成各在案嗣據張懷玉稟稱以天氣極寒冰雪載道請俟今春雪消天暖再行赴任等情茲該副將張懷玉於本年三月十八日到任所有分隸協標之漢隊勇營一千五百員名以及軍裝器械旗幟號衣並經前署塔城屯防副將白占春造具清冊逐一移交新任副將張懷玉接收清楚其員弁勇夫應領存餉

均截至光緒十六年臘月底止一律找發以清界限而免纏轢並據該副將等申報前來奴才覆查無異至辦理塔城地方善後經費亦經奴才劃分甘肅新疆巡撫照收所有地方善後事宜應聽委員辦理以歸劃一下部知之○魏光燾奏塔爾巴哈臺協標勇隊地方善後前准額爾慶額咨光緒十六年十二月十八日會奏定期十七年正月初一日分隸巡撫管轄等因當飭署該處副將白占春妥爲經理造冊具報並將分隸協標一千五百人月需餉銀由司撥解散放一面飭署精河營參將准補塔爾巴哈臺屯防副將張懷玉迅赴本任旋准額爾慶額咨轉協標馬步營旗員弁勇夫軍裝器械清冊前來並據張懷玉具報三月二十一日接印任事營旗弁勇及軍械等項業經照數接管現今查照撫提鎮各標酌議營制餉章並體察情形將所管馬步營旗分紮處所妥籌詳辦奏咨立案其地方善後事宜責成地方官次第辦理綏靖靖城上年經臣奏准作爲漢城爲副將同知等官駐紮之所署該副同知石本清已於本年四月初一日移駐城內副將張懷玉飭卽前往駐紮以資防守下部知之○已酉德福奏奴才前以四月十六日據捕廳同知裘履謙圍場總管玉書詳報突有馬賊夥聚一百餘人在屬屬之朝陽灣子等處地方豎旗持械白晝搶奪謀爲不軌當經奴才飛飭官軍合力進剿擊斃悍賊二十餘名生擒賊目高份治李忠亮黃有亮三名夥賊徐黑子屈保榮二名解郡訊明懲辦仍飭官軍極力搜拿並將出事出力人員由

奴才暫行存記等情於奴才巡閱國界回郡後五月初一日據情具奏在案奴才一面率同熱河道廷雍承德府知府啟紹理刑司員格圖鏗額等將已獲賊目高倫治李忠亮黃有亮夥賊徐黑子屈保榮等嚴行審訊據該賊犯等均皆供認夥同光緒十年在逃之僞平王唐主王端仁等約共一百多人在朝陽灣子等處懸旗持械搶奪施放火礮與官兵接仗拒敵等情不諱實屬兇暴衆著罪惡已極卽將該賊犯照章就地正法解往犯事地方示衆以昭炯戒嗣於五月初十日原摺將回恭奉 硃批知道了卽著飭令派出員弁實力搜拿毋留餘孽欽此欽遵在案查圍場與赤峯豐寧二縣接壤且自開鑛以來捷徑相通易於潛行出入惟赤峯縣地方與圍場東界甚近最爲馬賊勾結黨類出沒之區當此官軍在圍場剿剿之際誠恐賊匪逃竄滋擾奴才此次巡閱國界略悉圍場地勢情形當卽密飭赤峯縣知縣廖倫明署赤峯營都司訥欽泰揀派兵勇丁役會同練軍無分晝夜在山岔路口嚴密防範以杜逃竄其餘各要隘均已密派官軍處處堵截以防不虞惟因圍內地方縱橫千有餘里地廣山深兵馬所需糧食秣料向係無處購買是以從前捕務難免虛應故事此次進圍搜捕奴才深恐官兵枵腹剿賊不能得力當經奴才面飭糧捕總同知代爲預辦應需食物派員節節運送勿缺兵餐所需價錢由奴才發給仍嚴飭佐領全齡守備王文順等帶兵深入圍內圍剿處所極力搜拿務期盡絕根株復於五月二十四日據灤平縣知縣

營昌豐縣知縣何希遜署河屯協副將賈吉齡稟稱該縣所屬湯河川大閣兒等處有馬步賊匪五六  
十人肆行滋擾當經該處鄉勇擊斃三十餘名奪獲馬匹大小旗幟火鎗洋鎗火藥鎗沙並該匪等結拜  
盟摺等項多件餘匪均各逃竄無蹤等情稟報前來查湯河川大閣兒地方與西國甚屬相近此股  
賊匪似係欲向圍內勾結黨類因各處要隘防堵嚴緊該匪無可潛遁消息隨在湯河川一帶滋擾旋經  
擊散又據管帶練軍全齡王文順稟稱五月初四初七初八等日在圍內大棚塘石虎子梁等處連日搜  
捕格斃賊匪五名生擒韓玉沈三保卽沈洛三李泉志符玉順等四名燒燬賊巢四處奪獲馬匹鐵棒矛  
鎗火鎗多件嗣據赤峯縣知縣馬倫明著赤峯營都司訥欽泰稟稱遵照奴才密札各帶兵勇分往  
要路防守於五月十八日帳房川地方果有竄賊四名匿形潛逃當經識破其間洞有積年漏網巨賊王  
端仁該匪等看有官兵防守當卽分路竄竄該知縣等以王端仁向爲逆首立即跟蹤追捕數里之遙始  
行拿獲餘賊三名逃逸隨將王端仁押解縣署王端仁卽王佃仁供認是山東曹州府荷澤縣人年四十  
七歲曾在山東充當勇目得有頂翎自散勇後無可謀生自那年出口至今已二十多年向在黑沙灘魚  
泡子打魚光緒十年四月合已獲正法之楊長青大眾起意搶奪就在黑沙灘等處招聚夥黨四五百人  
沿途搶劫那年五月初間到宣化府管的劉家灣子搶了合和公當舖多方得了兩桿火礮兩桿鐵鎗三

雙火藥那時就聚了二千多人得了各樣器械造了四百桿四色號旗大家拜旗稱王端仁爲平王唐主楊長青爲總頭楊九如爲棚頭佔了當鋪後大家又到巴林旗各馬地方搶馬三百多匹回到合和公當鋪裏聽說經地方官兵前來捕拿就率衆列隊拒敵打死官兵不知其數官兵敗走卽與楊長青帶領大隊往經朋街抄搶又遇見宣化府熱河洋鎗隊均已趕到大家出隊接仗就被官兵打敗各自逃竄總頭楊長青棚頭楊九如已被官兵拿獲隨帶了三百多人逃往白岔板石房子又遇牌頭孫貴們打了一仗後就闖入七棵樹合成公當鋪殺了蒙兵四人又練軍鄉勇們一齊趕到小的連日打仗力乏就被打散棄了馬匹連日逃往關東八面城藏躲了這幾年復又與已獲的高伶治們商議在園內花兒胡同邀合夥黨正議起事忽聽現在熱河都統親身查園來了恐被拿獲大家商量先擄些銀兩暫且躲避未能走脫就被官兵打傷多人拿獲高伶治們那時各自散亂逃跑要想勾結報響走到帳房川卻被官兵拿獲送到案下辦了等情錄供於六月初四日將該逆押解前來奴才當卽率同道府司員等悉心研鞫該逆供認前情不諱卷查光緒十年六月間欽奉 諭旨匪目王端仁率黨二百餘人逃入園內未獲著嚴飭各員弁跟蹤追捕迭將在逃餘匪悉數殄除毋留餘孽等因欽此欽遵在案查該逆目漏網後至今七年有餘總未弋獲始則同楊長青等僞稱平王唐主率領二千餘人在魚泡子等處豎旗起事謀爲不軌

既經官軍擊散後逃往各處藏躲數年今歲仍敢嘯聚多人在園場花兒胡同等處地方滋擾勾結匪黨  
聲言報讐實屬行同叛逆恐不畏法當日潛逃出圍之時若非官軍誠破登時弋獲勢必滋蔓難圖復成  
巨患今自拿獲該逆匪之後地方賴以安靜除夥賊韓玉等四名均已訊明外惟王端仁係欽奉 諭旨  
飭緝積年漏網巨賊已逾七年之久現經拿獲訊供周實將該逆等暫行羈禁理合先行奏聞擬請於七  
月間再將該逆等照章懲辦以昭炯戒再地方文武員弁暨各練軍官兵等於奴才巡查圍外面授機宜  
均能實力遵行於山林叢莽之地暑熱炎蒸之天沐雨櫛風不分晝夜衝鋒冒險疊次接仗竟將積年漏  
網叛首拿獲生擒賊目陣斬夥匪至七八十名之多擊散全股賊匪不燬賊巢實屬異常奮勉刻下圍疆  
一律肅清應將駐防練軍馬隊河屯協步隊陸續撤回歸伍以節餉需仍嚴飭駐防園場練軍守備王文  
順園場總管玉書等不時搜查以期有犯必獲所有此次在事出力人員合無籲懇 天恩俯准獎敘以  
示激勵之處出自 逾格鴻慈如蒙 俞允再由奴才擇其尤為出力員弁核實保獎其出力稍次之弁  
兵等由奴才擇尤分別酌獎以勵士氣而策將來 上諭德福奏擊散全股賊匪生擒積年漏網逆首一  
摺園場地方突有馬賊竄擾經德福飭令派出官兵會同練軍迭次進剿擒獲賊目高份治等正法先後  
擊斃多名並將積年漏網逆首王端仁拿獲審辦緝捕尙屬認真王端仁著於訊明後卽行正法梟首示



衆仍著該都統嚴飭駐防圍場地方之練軍隨時實力搜查毋任匪蹤闖入此次出力各員著准其擇尤酌保數員毋許冒濫該部知道○庚戌張之萬等奏查定例每屆三年比丁一次自光緒十四年據各省查明比丁造冊送部後計至本年又屆行查比丁之期應行循例具奏請飭下在京及盛京江甯等省駐劄之滿洲蒙古漢軍都統將軍副都統城守尉等各傳行該管官員等務將滿洲蒙古漢軍新舊投充三代細數按戶出具佐領曉騎校領催連名圖結清冊送部如有可疑不堪入比應行除名之壯丁應由各旗都統將軍副都統城守尉等驗明確實卽行裁除至行查打牲烏拉比丁遵照奏明定例應由軍部咨行該將軍副都統城守尉等查照辦理又嘉慶二十三年六月考試八旗文生員監試馬步箭因年歲不符奏參奉旨嗣後派出監試馬步箭大臣等如查看有年歲可疑者俱著行查戶部若與冊內年歲實係不符再行參奏及內務府報出冊檔一體開寫年歲以備查核欽此欽遵咨行八旗都統內務府在案今本年輪應行查比丁除八旗內務府三旗壯丁應行入比者遵照舊例查辦外仍將此次新入京旗年已及歲並一歲至十五歲各人丁均遵諭旨造具確實年歲面貌清冊以備查核倘有年歲不符可疑不堪入比及隱瞞滿漢除名之壯丁等情將該管大臣至領催等一併議處伏候 命下遵奉施行待有如所議行○辛亥王文韶譚鈞培奏雲南自平定後黑夷匪後新設鎮邊關營仍酌留防軍藉資彈壓

管帶順義左營記名提督吳占勝駐紮蠻糯哨官補用參將鮑虎分防南柵相距四站南柵與耿馬土司  
毘連猛參土目罕榮先猛角猛董土目罕榮高彼此係屬近支榮先貧與榮高富均屬於耿馬而積不相  
能上年七八月間罕榮先因挾罕榮高侵地之嫌捏稱罕榮高勾結莽狙野夷將毀南柵欲向鮑虎請兵  
攻打兩猛因勾串吳占勝之差弁已革把總李庭先從中說合賄通文案貢生賀緒文即賀仲禔爲之主  
謀許以打開之日給銀四千兩鮑虎性直氣粗毅然應允由李庭先賀緒文等公立合同大字書名畫押  
鮑虎遂於八月初四日私帶防兵並調團練山南柵拔隊前往吳占勝聞信派弁持令追回鮑虎不從即  
於初十日打進猛角罕榮高敗逃莽狙遂將猛角擄掠一空罕榮先前後送給現銀及騾馬土藥作價共  
合銀一千二百六十兩餘約十二月初一日付清鮑虎旋將隊伍拔回南柵經普防營務處護理迤南道  
劉春霖訪聞稟請查辦等因報不勝駭詫當即批飭該護道馳赴鎮邊嚴切究辦而先以招撫罕榮高  
免開邊釁爲第一要義該護道行抵鎮邊即會同署鎮邊營參將尉遲東曉進駐南柵偵知罕榮高所在  
卽遣派土弁深入野山傳諭撫慰令連歸猛角聽候安插一面提集鮑虎李庭先等勒令將擄獲之穀  
米食物軍火騾馬等件一併交還並追出罕榮先所送贓銀五百十四兩發交罕榮高令其自行撫恤被  
難土民罕榮高及兩猛夷人感激涕零帖然歸業護迤南道劉春霖安插竣事卽於本年正月初十日親

身押解鮑虎李庭先等回抵普洱府城開印後迭經傳訊究追將原立合同繳案傳集應訊之營弁人等以合同是否立名往打猛角會否偕行所得贓銀有無分受取其確供分別罪名輕重稟請示遵等以案情重大復札發藩臬兩司會同營務處署後局覆加擬議詳請查核具奏前來等查土族互爭事所恆有因互爭而糾眾助勢亦事所恆有乃以官軍而受財聽糾助人私闖擄掠財物此則駭人聽聞目無法紀之尤者矣案關漢土交涉未便援守邊將領私自於已附地面擄掠者不分首從斬監候律擬罪致涉輕縱等平心核議此案除已革把總李庭先本係光緒八年耿馬土族罕恩慶爭鬪擄兵案內漏網重犯歷年逃匿夷地播弄是非復膽敢混跡軍營擄成巨禍實屬罪不容誅未可稍稽顯戮當飭通南道先將該犯就地正法外補用參將鮑虎以三品武員身充哨官不遵調度竟敢私立合同得贓賣勇擄土寨幾釀邊釁實爲此案罪魁應卽革職請旨立予正法以肅軍律貢生賀緒文卽賀仲壽主謀立約愚弄武員冀得巨贓不顧邊患外委孫占定楊有才隨同立約擄掠得贓應革去貢生官職一併正法惟賀緒文孫占定楊有才現均在逃已咨行各該原籍一體嚴拿獲日卽行就地懲辦都司劉朝聘把總梁玉廷周洪泰附和立約又隨同外出惟尙未分贓均請革職永不敘用都司潘體治蕭玉春千總羅東升鍾高把總張春盛外委馬玉堂合同有名並未外出均請一併革職記名提督吳占勝身爲管帶不能約

東將士致釀巨案且李庭先係其差弁賀緒文係其文案似此奸謀詭計竟無所聞實有難辭之咎現雖病故仍應請旨革職以昭儆戒並將賀連陞守備刁煥彩雖與鮑虎隔營並未外出亦未分贓但合同立名在前不能無罪均擬請革職惟賀連陞平日在防尚屬奮勉刁煥彩熟悉邊情爲土司所信服仍請留營効力俾贖前愆上諭王文韶等奏營員受賄聽糾攻破土寨請旨懲辦一摺據稱雲南猛參土目罕榮先與猛角猛董土目罕榮高挾嫌構讐罕榮先欲向參將鮑虎請兵攻打兩猛因勾串提督吳占勝之差弁已革把總李庭先賄通文案貢生賀緒文爲之主謀許給該參將等銀兩訂立合同鮑虎遂私帶兵勇攻破猛角肆行擄掠當經飭派道員劉春霖馳往查辦安撫土目人等一面提集鮑虎等追取贓銀撫恤難民將要犯李庭先就地正法土目罕榮高及兩猛人民均已帖然歸業等語此案參將鮑虎身充哨官膽敢受賄聽糾擅帶防兵攻破土寨並擄獲多贓實屬大干法紀著革職卽行正法以昭炯戒貢生賀緒文卽賀仲壽主謀立約外委孫占定楊有才隨同立約分受贓私均著卽行斥革該三犯現均在逃著卽通飭所屬並咨行各該犯原籍一體嚴拿務釋正法毋任漏網都司劉朝聘把總梁玉廷周洪泰附和立約尚未分贓均著革職永不敘用都司潘體治蕭玉春千總羅東升鍾高把總張春盛外委馬玉堂合同列名均著一併革職記名提督吳占勝身爲管帶不能約束將士於李庭先等串謀攻寨等事漫無

覺察致釀巨案實屬咎有應得現已病故仍著卽行革職以示懲儆餘著照所議辦理該部知道○壬子先是文郁奏口外蒙古地方各官向多簡任世家原期輕貨財而重廉恥俾蒙古臣僕得以相安無擾奴才風聞烏里雅蘇臺將軍托克滿本無學問吏治非其所諳試以戎馬或有餘衡以經濟則不足現在操握威權在 聖主方以屏藩視之寄以邊疆重任應顯秩者宜如何加意誦慎潔己愛人乃今春起程伊始由張家口包攬各鋪磚茶煙酒等貨六十餘駄責令沿途蒙古兵丁按站駄運到烏城後又向各商算取腳價並向喀拉喀二十站過索銀兩關係烏城派來迎接將軍之駝騎校古姓經手每站約索銀五十兩復任令家人按站折收供給席價統而計之需銀不下千餘金之譜且於喀拉喀各站每站索馬二匹尤爲彰明較著之事此將軍托克滿赴烏里雅蘇臺沿站婪索徧傳於人口者也奴才前閱邸鈔奉上諭何福堃奏告祭官員沿途婪索請旨申禁一摺國家遇有慶典派員分往各處告祭該員等自應恪恭將事豈容騷擾地方若如該御史所奏近來河南陝西等省致祭官員竟敢需索供應以致擾累民間實屬不成事體嗣後派往各處告祭人員務當潔清自矢毋得藉差勒索倘有前項情節定行嚴懲不貸等因欽此仰見 聖恩優渥矜恤民情無微不至乃邊疆大員按站擾索蒙古地方竟與河南陝西驛站被擾情形如出一轍殊堪駭異且復包攬鋪商雜貨官爲運轉尤爲貪鄙取巧並聞到任後辦公謁獻

改例章該處雖有蒙古參贊一切公事多不與之會商既失和衷共濟之道尤屬顯負 委任又聞庫倫地方前調宣化兵二百五十名駐紮蒙古日久思歸不無滋擾情事今地方既早平靜且有原設蒙兵或可藉資防衛似應酌量兵數之多寡地勢之安危分別裁撤未便聽其糜費餉項漸至擾害居民奴才既有所聞不敢安於緘默相應請 旨簡派大員嚴密查辦倘該將軍確有勒索臺站包攬商賈情事亟應照例嚴參庶資懲儆而靖站肅清矣 上諭軍機大臣等令奎斌確查具奏旋托克滿奏奴才於今春奉 旨馳赴烏里雅蘇臺將軍任所隨帶家人內有陳有者到任後奴才家務令其料理旋於本年七月間因該家人情形詭密使用其營究其來歷形色倉惶語詞支離自應澈底深追詎於九月初十日因該家人懶惰攆逐時乃見其衣箱行李沈重令人生疑遂命拆開於該家人行囊箱子內搜出銀兩數包約重不及千兩訊據實稱委因臨主沿途勒索等語正欲復行嚴究聞該家人乘間夤夜逃匿遂即飭屬四出嚴緝至今並無蹤影且蒙地山路紛歧頭頭是道實不知逃向何處俟拿獲訊明後另行報部核辦除將搜出此項銀兩寄庫以便發還各臺具領外伏思該家人既有勒索臺站情事難保其由口請傳駝馬時不無隱情再四詳查並無前項弊端至奴才由口赴任時惟察哈爾都統衙門照章傳給駝四十五隻曾以三十隻馱運煙茶一半備賞一半為購買買馬之用下餘十五隻分馱衣箱行李口糧隨帶兩起貢

差事畢回營弁兵三十餘員名所需烏拉雖係另傳一同行走觀之未免數目較多其實並未多需再奴才途次計期到任已屆購選皇進貢馬之際以故囑令各臺由產業牲畜內採買壯觀馴馬十數匹庶免臨期貽誤嗣經處處代買馬匹到任後隨時量物作價如數飭發給領訖今該家人既經漏網潛逃奴才豈能置身事外自係咎有應得惟思奴才屢受 皇上重恩不應有忝厥職茲既家人勒索臺站失於覺查自應先行請罪並搜出此項銀兩應如何發還各臺之處請 旨一併交部分別擬議查覆奏奴才本年在京接奉軍機大臣字寄七月初四日奉 上諭有人奏烏里雅蘇臺將軍托克湍於今春赴任時沿途勒索臺站騷擾地方等因欽此遵 旨寄信前來奴才到任後遵查口外臺站由張家口起至烏里雅蘇臺共計六十四臺前四十四臺屬奴才衙門管轄後二十臺即喀拉喀站歸烏里雅蘇臺將軍管轄奴才衙門所屬臺站向設參領四員分隊管理當經嚴密飛飭四段參領詳查將軍托克湍今春赴任有無騷擾勒索包攬商賈情事據實查覆並揀委賽爾烏蘇管站部員理藩院主事夢麟就近前往喀拉喀二十臺逐站確查該將軍逼索銀兩馬匹是否屬實詳細開報正在催辦間復於十月二十二日接奉軍機大臣字寄十月二十日奉 上諭有人奏烏里雅蘇臺將軍托克湍於赴任時有勒索臺站騷擾地方等情等因欽此遵 旨寄信前來奴才遵飭各臺及口內地方官如果該家人陳有私行來口即行拿獲

解審現查四段總領及管站部員理藩院主事夢麟分查各臺情形已經先後呈報到齊奴才逐加查核原奏所參該將軍托克湍今春赴任沿途勒索臺站騷擾地方逼索銀兩馬匹各情無一不確雖云各臺應付數目多寡不同而其威逼強索如出一轍委係實情自應查照各員呈報情形詳細覆奏查將軍托克湍赴任時准兵部勘合內稱騎馬十四包馬四匹引馬二匹又准兵部文稱將軍托克湍攜眷赴任應給車七輛自張家口起至烏里雅蘇城止計程三千八百四十里應折實銀二百三十九兩零由烏全縣支給並無傳給駱駝明文而所覆向章凡有將軍大臣出口回京無不傳駱駝送行李委因口外臺站以外無處僱覓車輛駝馬雖例所未備其勢不得不然向來各路大臣出口向係自行開具駝馬數目送交奴才衙門發給傳單其回京大臣由該處自發傳單各臺均照數預備檢驗近年將軍大臣赴任不過傳用駱駝三四十隻間有用至五十駝者均視行李多寡為定惡不謂該將軍托克湍今春赴任分作六起出口傳用駱駝竟至八十八隻內中雖有該城二起另項差弁並迎接該將軍弁兵隨同行走然差弁行李無多不應傳用如此多駝乃行至口外臺站猶以未足復私自添派每臺大車二三十輛及至無車之處每臺傳用駱駝一百餘隻自頭臺直抵烏里雅蘇臺均照如此預備若非包運商貨為用如此多駝恐該將軍亦無詞可解至馬匹既房烏拉齊等項無不任意多用其騷擾臺站已不堪苦累矣乃隨從人等



尤不安分按站勒索羊價兇惡已極各臺均稱係迎接將軍之委署騎校吉通經手始而言罵繼則鞭撻不敢不從吉通收受銀兩後搆有並無勒索結式逼令照緝押照且有強取茶布等情據四段參領查明除頭臺未經索銀外其餘各臺統計勒索銀一千四百十四兩至有無包攬商貨因隨從人眾不得而知未敢妄指此奴才衙門所屬四十四臺查明之實情也又據管站都員理藩院主事夢麟詳稱赴喀拉喀二十臺逐臺挨查詢究各臺蒙員咸稱今春將軍過境有隨員吉通聲言你喀拉喀二十臺係將軍管轄應多備用吩咐每臺各送將軍禮銀五十兩隨從衆人銀三十兩六錢贖羊十二隻每隻二兩一錢勒令刻即預備當時臺上各員再三央求隨員吉通立即威嚇如支吾少延即呈明將軍從重辦理臺上各員畏將軍威勢竭力措辦每站各送交吉通銀一百零七兩前十臺共過付銀一千零七十兩後十臺共過付銀一千零五十八兩八錢又將軍飭令各臺挑選馬四匹收留十四匹退回八匹其退回之馬每匹向臺上索取價銀二十五兩共計二百兩其收留之馬於九月間每馬發給價銀六兩各臺領訖關實至各臺呈送將軍銀兩均係吉通收受曾否轉交並未目睛再隨從人衆有無攜帶商貨亦不知情取具各臺官員切實甘結呈報此係喀拉喀二十臺查明之實情也奴才詳查原奏所參將軍托克湍沿途騷擾勒索車站逼索銀兩馬匹俱有實據惟包攬商貨一節各臺因隨從人衆不能指實隨飭張家口同知萬

全縣知縣摘傳口內口外向烏里雅蘇臺販運貨物鋪商逐加查詢均不肯承認既無證佐未便誅求惟查該將軍赴任均係隨員吉通承辦具包攬商貨若干向該員追問不難得實且喀拉喀二十臺結稱呈送將軍禮銀每臺五十兩合計千兩之多最關緊要該將軍曾否收受亦應向吉通嚴訊方能實情畢露相應請旨將烏里雅蘇臺營驍騎校吉通革職由該城委員解送刑部從嚴究訊以成信讞該將軍托克滿業經奏明實有勒索情事應否解任來京備質恭候 欽定 上諭軍機大臣等令奎斌研訊定擬具奏至是奎斌奏奴才前奉交查烏里雅蘇臺將軍托克滿被參各款業經查明該將軍實有騷擾勒索情事續晰上陳欽奉 寄諭奎斌奏遵查烏里雅蘇臺將軍托克滿參款據實覆奏一摺等因欽此遵卽咨提革弁吉通並札行各處嚴拿該家人陳有去後嗣據該將軍聲覆吉通已於上年閏二月咨部斥革遞回綏遠城等語登卽行文轉提旋准綏遠城將軍將吉通於本年二月二十日押解到口當經審據吉通供該將軍赴任隨帶家人並無陳有其人又將吉通所收銀兩交付何人並原參各款逐一研訊據吉通供去年該將軍由口赴烏里雅蘇臺任派伊前站差使經過凡六十四臺自三臺起將軍與隨行人等均折羊價每隻一兩二錢至二兩大錢不等自七臺起將軍加收禮銀每臺五兩至八十餘兩不等將軍所折羊價禮銀及將軍家人羊價分作三封皆伊與平安逐日面交將軍收訖據平安供去年二月將

軍由口赴任吉通派充前站並經營出進帳目走出第三臺各人均折羊價自七臺起至六十四臺止將軍除羊價外加收禮銀每臺羊價禮銀或數十兩或百餘兩不等連伊等羊價共三封遂日吉通面交將軍或由伊轉遞約共二千數百兩沿途所得銀兩分裝皮袋兩箇皆伊經營抵任後皮袋銀兩將軍收訖張有供去年隨將軍赴任沿途將軍折收羊價兼收禮銀均有其事皆係吉通平安兩人經手數目多少伊無由知等語此訊明吉通收受銀兩轉交將軍之實在情形也查吉通等承受將軍意指爲該將軍遍勒各臺銀兩至盈千累百之多計伊等婪索入己之贓應亦不少復訊據吉通供與周萬邦陳玉山曹富同充將軍巡捕沿途伊等羊價共折銀二百三十三兩隨時分用伊名下分得銀五十八兩二錢五分又將軍節次賞銀四十六兩五錢至喀拉喀將軍轄境二十臺每臺送伊前站費銀五兩共銀一百兩此外尙有兵丁王連魁等十二人共折羊價銀三百五十九兩已由該兵等分用伊所得前站費銀抵烏城後被將軍全數要去等語質之平安張有供尙非捏飾據平安供伊等沿途所折羊價計銀一百二十二兩五錢均交將軍收存分賞抵任後伊得銀六十兩張有師姓各三十兩但不知馮姓分給多少據張有供伊得過銀三十兩各等語此訊明該將軍隨行人等所得臺站銀兩之實在情形也至原參該將軍包攬貨物向該商索取腳價責令各臺按站駄運一節現由吉通帳簿查出實有攬貨情事訊據吉通供將軍

駐口月餘方起程赴任念跟人誅普准攬商貨收取腳價由驛站支差馱運伊等代將軍攬到興隆和等  
鋪貨馱總計將軍及該革弁等共攬貨馱六十九箇半行去頭臺沿途俾用駝馱八十八隻除將軍衣裝  
食品及隨人分搭行李用馱十八箇半外餘俱馱載所攬興隆和義順德兩鋪煙茶各貨提訊興隆和鋪  
民王仲綱義順德鋪民趙榮據供去年正月有官差吉通等向伊兩鋪攬運烏城雜貨興隆和鋪計發紅  
茶二百一十箱馱茶一百二十箱用馱四十六箇每箇腳價十四千文義順德計出馱茶九十三箱紅茶  
八箱紅煙八箱用馱二十三箇每箇馱價十六千文均如數交訖今蒙傳訊實非積慣偷漏除紅煙曾經  
完稅外所有偷漏茶箱均願補繳正贖認罰十倍各等語隨提到該二鋪帳簿核對所發各貨及馱價錢  
文數目均符此訊明該將軍及隨行人等攬帶貨物之實在情形也原參該將軍於喀拉喀各站索馬二  
匹一節據吉通供自四十五臺抵六十四臺將軍諭令每臺送馬二匹臺員因無好馬許俟夏季呈送到  
烏城後將軍因伊代攬貨駝每駝較別人短索駝腳價錢二千文將伊委騎騎校革去遞回綏遠城此後  
各臺有無送馬伊不得知等語據平安供將軍行至轄境二十臺每臺令送好馬二匹秋間各臺馬俱送  
到將軍挑留十數匹聞說發價伊於去冬蒙將軍賞給五品功牌改名永安派京差今春回至口上卽被  
傳案等語此訊明該將軍勒派所轄各臺之實有其事也查吉通帳簿於羊價禮銀駝價之外復有攬帶

跟役一款收過制錢一百二十千文訊據吉通供去年正月將軍在口尚未起程由周萬邦等攬來跟役八名內四名每名收錢二十千四名每名收錢十千共收制錢一百二十千文均撥存東紳店將軍隨時支用該跟役等出錢隨時馳騁藉省川資沿途並未滋事抵烏城後各自散去當時未問姓名不敢妄報等語質之平安張有供亦相同此查明該將軍於原參攬帶商貨外復有攬帶行人冒爲跟役得受錢文濫傳騁馬之實事也以上各節奴才親加提訊各供前情不諱應即擬結查將軍托克滿於屬員勒索臺站包攬商貨濫索駝馬通算得贓三千餘兩爲時甚久爲數甚多若非有意縱容何以當時並不舉發自不得以失察論事後人言藉藉希圖卸罪竟敢捏造家人陳有之名欺飾入奏審實並無其人更不得以檢舉減議論當此臺站疲累之際應邊寄者宜如何潔己率屬體恤蒙情以副朝廷綏養藩部之意乃該將軍資吉通爲牙爪而殄隄其貪求吉通藉將軍之威權而益張其兇獠以至廝輿走卒爭相效尤重轉噬所過騷然臺眾蒙累無不痛心疾首跡其縱容屬員攬貨分肥騷擾臺站倚勢勒索駝馬威嚇多贓且有通同婪索欺飾入奏各情節殊屬辜負天恩營私濫職惟係一品大員應如何懲處之處伏候聖明嚴斷非奴才所敢擅擬其贓銀照例請旨飭部追繳分別入官還主已革驍騎校吉通充當將軍前站隨員勒索各臺銀兩通計婪入贓款至三千四百餘兩之多皆伊一人倚勢用強威逼所得並敢

代該將軍贖貨漁利擾累經過地方核其情節和種荒謬竊爲此案罪魁定律監臨官吏挾勢求索所部內財物強者計贓准枉法論該犯係有祿人得受懲贖羊價及將軍賞銀二百零四兩七錢五分又包攬商貨分受制錢二十八千文折銀二十八兩通算已入之贓共銀二百三十二兩七錢五分應照名例准枉法論罪止杖一百流三千里律擬杖一百流三千里係職官從重發往新疆充當苦差據稱所受前站費銀已被將軍案去其餘贓銀仍照例追繳惟該犯情節較重不准援限內完贓之例免罪家人平安即五品頂戴永安分受羊價銀六十兩又分受贖貨腳價制錢七千文折銀七兩共受贓銀六十七兩張有分受羊價銀三十兩又分受贖貨腳價制錢七千文折銀七兩共受贓銀三十七兩准枉法論平安即永安罪名應杖一百流三千里無祿人減一等擬杖一百徒三年張有罪應杖八十徒二年無祿人減一等應杖七十徒一年半照例均限一年全完免罪不完再限一年勒追全完各減一等發落如不完卽行發配烏里雅蘇臺綠營外委陳玉山周萬邦曹富兵丁郭振雄張貴醇振貴馬兆瑞褚潤緒廷魁李獻廷田玉喜王春魁馬喜林焦金寶姚喜共十五人均經分用折收羊價銀兩暨包貨腳價錢文外委雷英王連魁馬獻吉兵丁劉萬寶何兆明劉福承夏玉李成林常林中存仁李生枝楊金仁楊萬金趙寬共十四人均經分用包貨腳價錢文各有應得之罪惟相隔三千八百餘里人數衆多勢難紛紛提訊擬請飭下

該管將軍大臣就近訊明分別定擬以省拖累師姓等緝獲另結興隆和義順德二鋪補抽正釐並罰項共銀一千四百六十兩零俟勒限追齊專咨報部聽候指撥起出帳簿分別存案發還又奏口外盜站支應各項差使本極紛繁而近年過往大小各差每每不遵定章多傳屬羊駝馬蒙古素性馴順懼以誤差獲譴雖羅掘淨盡亦必勉力支持以致各城弁兵均視馳驟為利源奉差為調劑雖不盡為吉通之貪橫而藉為漁利久已習為固然奴才到任以來各臺呈報苦累情形求為拯恤者不一而足若不亟圖整頓嚴定限制少紓臺力誠恐日積月累益將不支設遇緊要差徭貽誤匪淺可否由奴才詳察情形酌擬章程數條奏明請 飭部核議通行各處以為遵守藉蘇積困而禁多求大局幸甚蒙民幸甚 上諭前據御史文郁奏參烏里雅蘇臺將軍托克滿於赴任時有勒索臺站騷擾地方情事當諭令奎斌確查具奏旋據托克滿自行檢舉請交部議罪並據奎斌查明委員吉通收受各臺銀兩請送部嚴究復經先後諭令該都統確查研訊並將家人陳有嚴拿到案澈底根究定擬具奏茲據奎斌奏查明將軍托克滿被參各款提訊吉通及家人平安張有等供認該將軍勒索騷擾等情均有實據請旨分別懲辦等語此案烏里雅蘇臺將軍托克滿於經過臺站時竟有勒索羊價禮物縱容屬員家人搬貨分肥勒派駝馬復捏造家人陳有之名希圖卸罪實屬貪黷徇私辜恩濫職托克滿著即行革職仍追繳贓銀分別入官歸還已

革曉騎校吉通著從重發往新疆充當苦差所有分收贓銀之家人平安張有均著照擬懲辦外委陳玉山等卽著該都統咨行各該管將軍大臣就近查明分別定擬餘著照所議辦理另片奏酌擬章程整頓驛站等語卽著該都統悉心酌核妥議具奏該部知道○中寅調劉樹堂爲浙江布政使以潘駿文爲福建布政使張汝梅爲山西按察使○以承德爲烏里雅蘇特將軍吉陞阿爲察哈爾副都統○乙卯予捐賑提督周達武建坊獎敘○丙辰以湖北鄖陽鎮總兵葉高會著私妄作撤任查辦○王文韶黃槐森奏獨山州界連荔波縣與粵西接壤游匪出沒時有聚衆搶擄爲害良民臣槐森在臬司任內查悉前情嚴飭該地方官認真清查保甲聯絡民團及駐防練軍分投巡緝以安善良在案茲據署都勻府知府王繼先轉據署荔波縣知縣梁宗輝署獨山州知州黃增益先後稟報獨山州屬界連荔波縣之岑洞壘寨等處本年三月初三日訪聞匪酋陸老鐵約同莫金保在該處聚衆百餘人肆行搶掠結盟豎旗謀爲不軌附近數十里民心驚惶紛紛遷避隨飭土司楊澤敷遣團丁楊澄潛往偵探情形被該匪拿獲殺死祭旗一面遣夥匪分往各處招集流亡盟黨陳金山黃玉堂混入該州城中爲放火內應經該州拿獲搜出短刀火器號片等件訊明實情立正典刑當經移會營員派撥兵練調集鄉團前往堵剿等情並據署古州鎮總兵升用總兵李景昌署貴州道候補道袁開第會稟如前等卽飭營務處司道飛飭都勻獨山荔



波地方文武並水營管帶營率練團前往相機剿辦以靖地方旋據管帶勃波營練軍副將全忠孝帶領步隊會同該署州黃增益該署縣梁宗輝率領營弁團練人等乘其外匪未集於初十日黎明進攻賊寨該匪揚旗分隊衝出接仗我軍奮勇直前殺斃悍匪十餘人奪獲賊旗二面鎗刀多件賊仍退守巢穴我軍乘勝圍攻施放鎗礮當將賊巢攻破復殺匪黨十餘人我軍陣亡團丁二名受傷六人該匪紛紛奔潰經兵團等繞前截堵鎮斃首要陸老鑽割取首級梟示並獲重傷匪黨辜阿依一名旋即身死復生擒匪黨吳龍幅莫阿長羅大冷姚老四梁明正潘阿領龍佑陸白受陳開芳黎三等十名已由署臬司黃元善會同藩司王德榜迅飭接署都勻府知府許乃興將各犯提審確情錄供稟報如有兇悍接仗法無可貸者即當批飭就地正法以昭炯戒歸入每年辦理土會各匪案內彙奏若係被脅勉從情有可原者亦即分別辦理務期無枉無縱現在農民歸耕地方不靜堪以仰慰宸廑臣查該匪陸老鑽糾眾聚旗分招外匪謀為不軌幾釀亂階幸地方文武團練乘外匪未集先攻巢穴陣斬首要剿撫兼施未及十日仰賴天威殄滅巨魁悉除湯惠而快人心辦理尙為迅速不無微勞足錄查署獨山州事知州銜候補知縣黃增益署勃波縣事運同銜缺另補知州梁宗輝總兵銜留黔遇缺儘先補用副將全忠孝該三員親督練團衝鋒破敵洵屬尤為出力可否籲懇天恩俯准獎勵將黃增益歸候補班前先補用梁宗輝歸

候補班前先補用全忠孝免補副將以總兵記名簡放出自 逾格鴻慈此外營弁團丁人等由臣等查明酌量外獎以示鼓勵 上諭王文韶等奏土匪糾眾滋事捕斬首要各犯地方安靜一摺貴州獨山州屬岑洞墨寨等處本年三月間匪首陸老鐵莫金保等聚眾百餘肆行搶掠分遣夥黨陳金山黃玉堂混入州城約期內應經該州拿獲訊明正法復經派出之副將全忠孝等進攻賊巢斃匪二十餘人當將賊寨攻破陣斬首逆陸老鐵生擒匪黨吳龍幅等分別訊辦緝捕尙屬認真仍著王文韶黃槐森嚴飭地方文武各員速將逸匪莫金保嚴拿務獲毋任漏網著獨山州知州候補知縣徐增益著以知府歸候補班前先補用開缺另補知縣梁宗耀著以知州歸候補班前先補用總兵銜留黔補用副將全忠孝俟補副將後以總兵記名簡放以示鼓勵餘著照所議辦理該部知道○劉坤一奏為政首在安民而安民必先除暴江蘇自兵變以後伏莽未靖游勇會匪到處勾結為患以致盜風日熾剽劫頻仍臣到任後江南北各屬稟報搶劫之案日必數起多有執持火器拒傷事主與昔年臣在兩江時情形迥異口下丹陽江陰無錫金匱陽湖如皋等處焚燬教堂之案層見疊出皆由匪徒從中煽惑藉端思逞業已欽奉 諭旨飭令拿拿匪犯嚴行懲辦此等搶劫盜匪雖與滋鬧教堂有間而其為地方之害正復相同一經獲案審實之後若不立予懲創無以戢其不軌之志而銷其作亂之萌光緒十三年經江蘇撫臣奏准將淮安徐州

海州三屬凡有強盜殺人放火等項例應斬梟之犯均卽先行正法在案查徐州等屬原以民俗犷悍盜匪出沒靡常爲此權宜之計現在江甯江蘇各府州屬盜賊滋多人心不靖亦與徐州等處情形相埒各州縣獲犯破案遇有殺人放火等項重情若必逐一解省審勘則情罪重大之匪與尋常盜犯同科已獲者顯徵猶稽未獲者益無忌憚實不足以昭炯戒擬請嗣後江蘇江甯各府州屬凡遇強盜殺人放火有千六項並竊盜火器拒殺事主及執持火器傷人例應一併之犯一經各該州縣訊明由道親提覆審明確案由臣核明後卽行批飭在犯事地方先行處決一面具奏並將供招咨部查核俾得速正典刑以寒匪膽而靖地方其餘尋常盜犯仍照定例辦理竊維人命至重但可不用重典亦何敢稍涉嚴苛第因時制宜不敢不暫行變通以期民畏鮮犯仍俟待稍靖再行照例解勘以重刑憲嗣後卽以捕務之勤惰定各該營縣之優劣如竟仍前因循不知振作卽當嚴行參辦倘能認真緝捕拿獲著名會匪及首要盜犯亦當將出力員弁擇尤彙奏請優獎以昭激勸待 旨如所請行○丁巳劉坤一奏南洋水賊臺船四號於光緒十一年經前督臣曾國荃將該四船移駐江陰添設礮位募勇防守奏明在案臣查該水賊臺船四號係前督臣左宗棠於光緒九年購置迄今將及十年終歲停泊江干風日摧殘江湖艤船身日形朽敗重加修葺所費甚鉅且恐仍難經久自應卽將此項船隻裁撤以節糜費其船隻舊料交上海

興道局收用所遺礮位卽於江陰營庫存儲由該統領派員妥爲看守或換置該處兩岸礮臺江陰爲入江門戶地方緊要將來萬一仍須添設水礮臺自當因時制宜由臣另行奏明辦理以重防務下所司知之○戊午遣夏培恭詣顯佑宮致祭○庚申萬壽聖節上詣大高殿壽皇殿行禮○上詣儀鸞殿慈寧端佑康頤昭豫莊誠壽恭欽獻皇太后前行禮御乾清宮受賀○李瀚章奏查前兩廣督臣張之洞因瓊州海灘散漫擬築礮堤二十餘里訂購外洋七生半車礮一百二尊於光緒十五年九月二十日具摺奏明在案現經德國克虜伯廠一律造齊運送到粵臣逐細查閱製作精美車礮礮彈俱全實爲行軍利器惟用之於粵不甚合宜粵地潮濕異常瓊州愈甚白蟻滋生無物不蝕礮架皮墊等物必易損壞礮身更虞銹蝕一也粵地多山無所馳騁瓊州海灘非沙則淤輪蹄易陷況車礮甚長堤上難以旋轉二也粵省向不產馬又乏料豆營馬購自川黔身材既小畜牧維艱以之配駕重車力不能勝殊難適用三也此蓋限於天時地勢無可如何懇請將弁所言皆同臣思瓊州沿海地方雖形散漫惟當力守要隘以遏其衝若明知車礮不宜而姑用之非微臣謀國愚誠所敢出也查此項車礮堅利異常置諸廣漠之區戰守均能得力因思直隸及東三省地勢高爽馬匹膂壯土壘足以任重平原足以馳驅如海防邊防練習馬隊不可無此利器與其留於廣東時虞損壞莫若移之北路守衛京畿臣電詢直隸督臣李

鴻章意見相同擬即籌商起運解赴天津點收由李鴻章分撥留存以備緩急之用至其礮價銀兩以及保險運費已由粵借款清給應仍歸粵省造銷將來直隸如能籌還再行奏明辦理得旨如所請行

○剛毅奏吳淞江河道急需開濬臣於去年十月委員駐工興辦調勇協夫分隊挑挖曾將隨時履勘情形並將出力員弁擇尤保獎專摺奏奉 硃批著准其酌保數員毋許冒濫欽此欽遵在案旋據稟報三月初十日挑工完竣當經臣親赴工次按段驗收自四江口迤東之橫縷口起至新閘大王廟止工長一萬二千五百餘丈原估面寬十丈坦坡二丈五尺底寬三丈平水面浚深一丈一尺共實挑土八十五萬九千三百七十五方有零河身僂見寬闊坡面一律坦平均係如式通利並無草率偷減情弊即於三月二十六日開啟各閘以便舟楫而資灌溉統計土方人工營勇犒賞以及築壩岸水工料等項共用銀一十六萬九千餘兩一切經費在於賑捐餘款積穀息銀暨各屬攤徵河工歲修項下支用未敢輕動 國帑自可邀免造冊報銷茲據蘇州藩司鄧華熙核明在事異常出力文武共十九員酌議分別獎勵開單詳請具奏前來臣伏查開浚河道水利常政原係地方應辦事宜非同創舉足資觀聽人情避難就易厭古喜新巧於立異矜奇而疏於實事求是往往皆然吳淞江年久失浚臣常推原其故不特集事之款不易籌抑且任事之才難其選臣任事以來即與前蘇州藩司黃彭年通盤籌畫並於接見僚屬時留心存

記迫撥款勉可供支始定兵民協挑之議惟全功義延七十八里營勇民夫分認地段同時並舉監視照料者三里一弁五里一員在在胥關緊要而彈壓催繳綜覈鉅細尤形喫重自非公忠廉能之員不足以資督率卽經遴派候補知府周蓮趾工總司其事復委蘇州府總捕同知惠榮協同辦理各該員奉委後或奔馳兩岸久歷風霜或泥淖一身無間晨夕又皆能設法籌催盡力節省閱時僅及六月全工一律竣事洵屬實心實力奮勉急公未便沒其勞勩復查單開各員均係勞績最著經臣目覩遂加核減無可再刪謹繕列清單恭呈 御覽合無仰懇 天恩俯念此次工鉅費省辛勞備嘗實與尋常修浚河道情事迥不相同 准予照請給獎出口 鴻慈逾格下部議奏○壬戌張曜奏查黃河入夏以來四月二十日以後河水時有長落埽段間有壅陷其時臣閱伍未回卽由藩司福潤會督在工文武隨時搶護平穩五月二十六七六月初二三等日時屆伏汛水勢日長六月十八十九等日有陡漲至一尺二三寸二尺三尺者向來豫省河水增漲一尺則曹州所屬河水卽增漲一尺七八寸不等壽張縣以下卽增漲三尺一二寸不等其長水尺寸不一蓋河身之寬窄不同也至長清縣以下有山泉諸河匯入水勢愈見增漲盈堤拍岸洶湧異常據兗沂曹濟道申衡參將張仕忠濟東泰武臨道張上達副將黃金得河防提調知府葉潤合營官參將沙明亮候補道李希杰沈杞植慶等稟報埽壅陷均已搶護平穩各情現在伏

汛盛漲防守緊要之時遇有極險工程並添派候補知府多培會同搶護現惟歷年北岸史家場大溜滾刷第三第四挑水溜兩座隨鑿隨淤陽北岸五楊家第五第四兩壩大溜頂衝危險異常此缺彼蝕淘刷不已均已極力加鑿其餘險工均已搶護平穩臣惟有往來河干認真督飭期保無虞以副 宸厪報聞○張曜奏山東黃河防汛從前兼令民間派夫助守經年在堤幾廢農事以致轉爲民患嗣改爲二月以後添僱短夫接發口糧與勇營彷彿及至霜清以後始行分別裁減所費不支所有應添短夫臣與河防局司道再四籌維變通辦理應令近河村莊擇用首事莊長僱定民夫編造名冊無事各居本莊遇有附近堤埝出險立赴河干幫同運土搬料以厚人力仍按口發錢以示體恤工竣遣令回家既有益於河防亦無妨於農事民間極爲樂從現已一律照辦下部知之○是月比利時國以陸彌業署理使事

光緒一百五

臣朱壽朋敬編

臣汪錫增恭校

秋七月癸亥朔時享 太廟 上親詣行禮○甲子劉秉璋奏成都等郡建有蜀漢臣趙雲廟夙著靈顯請列入祀典下禮部議奏○乙丑調鄒紹忠爲廣東水師提督以婁慶雲爲湖南提督劉世俊爲廣東潮州鎮總兵○丙寅依克唐阿增祺奏奴才依克唐阿於去歲冬間查閱呼蘭巴彥蘇蘇綏化三城當將各處熟地之所以浮多詞訟之所以繁盛旗丁之所以苦累會衆之所以殃民容俟副都統增祺到任核議妥章再行分理籌辦等因均經奏明在案惟查呼蘭等處自開墾以來所有積弊情形雖經歷任派員釐剔究未能盡絕弊端爲今之計若非爲守兼優之大員前往籌辦殊不足以壯聲威而資整頓本年三月間副都統增祺到任奴才依克唐阿即將整頓呼蘭等處一切事宜屢次熟商意見相同章程自應酌定奴才等伏念向來興利不難剔弊爲難蓋積弊益深相安益固縱一旦欲爲剪除不爲刁紳所撓卽爲巨室所籍甚至來省瀆呈赴京上控種種刁風遂致有心整頓者未免徒形扼腕此弊之所以日深世風之所以愈下也奴才等此次擬丈各屬浮多之地亦惟不辭勞瘁不避怨嫌以期上不虧 國下不擾民而



已但章程既定事件既繁自應揀派隨員由奴才增祺督飭挨段丈清除將山澤石塘水衝沙壓疎濬瘠  
礮不計外再查其原照地數若干現在浮多若干丈明後僅可加浮多之照而不索已往之租至流民私  
租舊日所放之荒邊已歷年數並未納租從此若皆驅逐尤恐該民無所依歸致生別故奴才再四籌商  
惟有逐戶清查逐地勘丈究竟戶有若干地有若干即令按响作價發照納租嗣後民間倘有互買互賣  
之地亦令隨時報稅立契用便鄉民如斯釐定各章倘蒙 俞允不惟從此可以免奸民飛印照造偽契  
隱匿錢糧且更可以清佃民興地利增稅賦永裨地方至如何清詞訟以恤冤民濟旗丁以資養贖揀會  
總以保鄉村之處均由奴才增祺隨時察看情形以便相機籌辦但各隨員來往奔馳備嘗艱苦亦未便  
令其枵腹從公擬將各員口費分作三等從優籌給以資廉隅而免舞弊惟邊疆瘠苦無款可籌所有口  
費一節即由丈餘之地價新加之照費項下動支至丈餘即行升科之地租亦即隨年造冊報部一併歸  
入俸餉案內藉以接濟官兵俾期經久現屆青禾在地之時未便行繩勘丈即擬於八月間奴才增祺帶  
領委員前往呼蘭會同該城副都統倭克津泰和衷共濟次第舉行以上擬辦各節雖關緊要究非輕易  
所能爲統俟事竣倘有成效可觀擬將在事出力人員分別請獎奴才等爲整頓地方起見不得不懇此  
鼓勵之名以期踴躍而便濟公其餘倘有未盡事宜窒礙難行之處奴才等往返咨商妥切再行奏 聞

遵辦下部知之○丁卯予故大學士左宗棠原任兩江總督沈葆楨於福建福州船廠學堂附近建立合  
祠列入祀典○予剿捕馬賊陣亡記名副都統喬通阿等優卹○鹿傳霖奏陝西漢中府之留壩廳於乾  
隆十五年移該府通判分駐於彼三十年撥鳳縣地界設爲撫民通判三十九年改爲同知一切刑名錢  
糧均隸廳治維時地居邊徼文教未興應試生童仍歸鳳縣合考迄今百有餘年戶口漸臻稠密士人奮  
志讀書文風日有起色核計現入該廳丁冊文武生數百名應考文武童生至三百七十餘名較之近隣  
繁劇各縣數目相仿該廳素號瘠區士民耕讀並營生計極窘每遇考試之年寒賸資斧難辦不免向隅  
輿歎且人戶以籍爲定在居留壩應考鳳縣廩保無從認識官吏亦難稽查易起詐冒攻訐之弊據該廳  
同知陳文毅援照孝義實陝兩廳成案請設學校當經批飭該管陝安道漢中府督飭確查妥辦酌擬自  
下屆爲始該廳歲考定以額進文武童生各六名科考額進文章六名廳民五方雜處客籍甚多廩增額  
缺似宜稍爲從寬以便互相認保應請定以廩增額缺十五名以次幫補二年一貢新補廩生照例食餉  
十年後方准出貢所有該廳廩增額缺從前孝義等廳係由他屬抽撥查明漢中府屬之南鄭城固洋縣  
各學額一十五名廩增各二十名甯羌州學額十二名廩增多至三十名略陽鳳縣學額八名廩增亦各  
至二十名擬卽在於甯羌略陽鳳縣三屬額設廩增內各抽撥五名以足該廳十五名之數應設儒學膏

羌州學額不多事亦較簡向有學正訓導各一員如留學正一員可期勝任應請將該州訓導一員移爲  
留縣屬訓導俸工廩斗等項均仍其舊文廟學署俟經費稍裕再行設修暫於該縣紫柏書院供奉先  
師神位展修時祀訓導暫認民房棲止辦公歲支廩膳祭祀銀兩照例開支如有未盡事宜另行酌議咨  
部立案等情繪具輿圖查造冊結由該管道府詳山藩司張岳年詳請具奏前來臣查留縣屬設治已逾  
百年聖澤涵濡人文逐漸可觀學校迄未創立洵屬闕典茲據援照孝義等屬成案請設學額抽撥增  
廩各缺量移訓導係爲因時制宜振興文教起見伏乞 勅部議復施行下禮部議奏○戊辰歲繼格於  
紫雲城內騎馬○諭下寶第奏命案首犯逃匿鄰縣令不服查訊據實奏參各摺片案關職官庇匪玩  
法竊屬不成事體著派希元提集卷宗人證嚴行審訊按律定擬具奏毋稍偏縱廣東饒平縣知縣王崧  
著先行革職卽著李瀚章派員押解赴閩並勒令王崧將王粗皮及饒卒郭專饒平差役林江黃亮一併  
解回歸案審辦以成信讞原摺片著抄給希元閱看○己巳以張蔭桓爲都察院左副都御史○予年逾  
百齡五世同堂之四川梁山縣壽民羅儲錦閩中縣壽婦楊氏旌表並各賞銀段○張曜奏伏汛各工搶  
護平穩報聞○辛未 上詣 建福宮行禮○遺載卓恭誥 襄陵致祭○李鴻章奏前天津道吳毓蘭  
請仍遵前 旨照軍營病故例議卹得 旨如所請行○李鴻章奏故雲貴總督岑毓英之子監生岑春

贊捐賑請獎得 有岑春煊著以知府儘先卽選○以安徽舒城縣與女孫明義等捐賑傳旨嘉獎○壬申遣麟嘉恭詣 景陵致祭○癸酉子年周百齡五世同堂之四川彭山縣壽民吳國俊旌表並賞銀段○額爾慶額奏奴才查塔城開花礮隊現有格林礮二尊開花礮五尊額設漢兵六十名藏兵六十名共一百二十名均由各營挑撥不另給餉鎗礮爲行軍利器尤須平日訓練精熟致連命中以期有備無患現在漢隊既經交餉一千五百名所存人數較少實屬不敷分防所有抽撥各營兵額一百二十名擬令添補足額以便操防惟兵額既添而礮隊經費尤須另爲設法每年應加銀四千餘兩奴才擬由塔城軍器項下量爲裁減以資挹注似此通融辦理於營務邊防兩有神益如蒙 天恩俯允容奴才再將議定餉章奏咨立案以便遵守得 旨如所請行○甲戌 上詣 建福宮行禮○遣連嘉恭詣 昭陵致祭○乙亥松椿奏山東運河道工次被劫人犯解東歸案得 旨卽著咨行山東巡撫歸案審辦○張曜奏查光緒十三年五月臣接准部咨刑部議覆大學士直隸督臣李鴻章請將匪徒執持烏鎗洋鎗嚴定罪名一條嗣後遇有強劫及竊盜臨時用強並結夥十人以上之案但有一人執持烏鎗洋鎗在場者不論曾否傷人不分首從均擬斬立決以示等因通行各直省一體照辦惟販賣私造烏鎗洋鎗者應如何加等嚴懲地方官失察應如何重加處分均未議及臣維法貴因時治宜探本近來城市鄉鎮私造販賣者

所在多有遂至輾轉流入盜賊之手今持鎗之盜既予駢誅而私造販賣之人竟得逍遙事外似無以昭情法之平惟若輩行蹤詭秘非地方官嚴密查拿亦不能全行禁止相應請 旨飭部分別嚴定民間私造販賣鳥鎗洋鎗各罪名並從嚴議定地方官失察處分俾知儆畏下刑部議奏○丁丑 上詣 奉先殿 壽皇殿行禮○戊寅魏光燾奏新疆省城設立書院鄉飲生恩下部知之○諭吏部奏遵議處分一摺理藩院尙書松森應得降三級調用處分著加恩改爲革職留任○諭劉坤一奏特參庸劣不職之道員州縣請分別革職降級一摺江蘇補用道來年享人才猥鄙同列羞與爲伍著卽行革職勒令回籍按察使銜候補道馮邦棟辦理鹽務舉措乖方著革去按察使銜道員知府以同知歸部銓選通判直隸州知州裴大中劣跡多端致滋物議如阜縣知縣羅理章因災緩報貽誤公事均著卽行革職以肅官方餘著照所議辦理該部知道○諭劉坤一奏特參庸劣武職大員請分別降補一摺記名提督黃琬堂營帶勇丁毫無紀律著革去提督總兵以副將仍留江南補用候補游擊吳爲學恃符刁狡物議沸騰著革去游擊都司以守備仍留江南補用以觀後效餘著照所議辦理該部知道○己卯 上詣 奉先殿 壽皇殿行禮○還載澍恭詣 定陵致祭○庚辰 上詣 國寓 醇賢親王金棺前行禮○以勸辦順直賑捐出力予各省督撫劉秉璋李瀚章張之洞王文韶楊昌濬許振祿崧駿沈秉成德馨張煦張曜劉瑞

祺譚繼海譚鈞培潘霖馬丕瑤劉銘傳鹿傳霖剛毅等加一級紀錄三次○裕寬奏奴才於光緒十七年二月十二日承准軍機大臣字寄光緒十七年二月初七日奉 上諭有人奏河南溫縣知縣李普潤徵收糧價逼令鋪商承買官銀索費數千兩凡詞訟案件縱容書差丁役索賄攪擾前在唐縣任內伊兄坐堂徵比錢糧尤屬荒謬等語所奏如果屬實亟應從嚴參辦著裕寬按照原參各節確切查明據實具奏毋稍徇隱原摺著摘鈔給與閱看將此諭令知之欽此遵 旨寄信前來當經奴才分飭彰衛懷道懷慶府暨南汝光道南陽府分別就近切實密查去後茲據先後稟復前來奴才覆加查訪該縣李普潤被參逼令鋪商承買官銀藉端索費威逼閉市聽信丁役之旨縱容攪擾索賄以致土棍勾串捏控拖累並該員日昃方起及在唐縣任內其胞兄坐堂徵比錢糧各節均查無其事其原參嗜好太深該員前任唐縣時曾以累毀治病經前撫臣倪文蔚即以該員體弱多病奏請開缺雖早已調治復原或即因此傳聞失實如果實有嗜好前撫臣何能復畀以地方之任請補溫縣之缺是其尙無嗜好亦屬可信惟於人命竊盜及鬪毆傷重之案輒用無印小票拘傳雖為迅速起見究屬不合相應請 旨將溫縣知縣李普潤交部照例議處得 旨如所請行○癸未王文韶譚鈞培奏前因耿馬宣撫司所屬猛參土目罕榮先與猛角猛董土目罕榮高挾嫌互爭賄通防營攻破猛角塘掠財物經臣等將贖大妄為之營口等摺奏參

請旨從重懲辦並聲明將查辦安插情形另行奏報在案當臣等聞報之初以罕榮高逃避狝狽難保不勾結野夷致開邊釁是以招回罕榮高妥爲安插最爲此案緊要關鍵當飭護理迤南道劉春霖馳赴鎮邊會同署參將尉遲東曉相機辦理去後該護道行抵鎮邊卽札委猛連下猛允土目刁金華前往開導並查知永昌府屬之猛定土知府罕忠邦爲罕榮高親戚狎狽夷酋葫蘆王與罕榮高素有往來因一併諭令幫同勸諭罕榮高始則心懷疑慮不敢回歸繼刁金華罕忠邦等開誠撫慰葫蘆土亦正言諭解並許以親自送回猛角聽候安插罕榮高乃深信不疑俯首聽命此招回罕榮高之辦理情形也查光緒八年耿馬土族罕恩慶因爭襲構亂經前督臣劉長佑等派委迤西道熊昭鏡前往查辦該將猛角猛董地方撥歸罕榮高管轄與耿馬土司罕榮陞以撫壩河爲界並聲明如五年後委實相安再行詳請奏咨給與土職俾之世守等因奏明有案此次劉春霖辦理安撫仍遵照光緒八年奏案以撫壩河爲界令罕榮陞罕榮高各具遵依切結以免再啟爭端此安插罕榮高之辦理情形也猛董土目罕榮先爲此案禍首罪有應得先經該管宣撫司罕榮陞傳案研訊罕榮先畏罪服毒自盡據報前情姑免深究劉春霖於查辦竣後以罕忠邦刁金華辦理招撫潛消邊患葫蘆王深明大義共矢忱懇請量予獎勵以資觀感經臣等札飭督後局司道會同核議茲據詳請具奏前來臣等覆加查核罕榮陞職居宣撫平時漫無

約束以致土族互爭罕榮先到案乃不能嚴密看管訊明確情稟請治罪致令服毒斃命本屬罪無可辭姑念一經開導即將兩猛照案交出具結永遠應從寬免其置議罕榮高被罕榮先私串防兵圍攻猛角不敢抗拒棄寨而逃亦未敢挾忿尋仇聽候官爲處置安分守法較前有加應查照前案請 旨從優給予土千總之職管理猛角猛釐地方准其世襲耿馬本順甯府所屬現查該兩猛距新設鎮邊廳較近一切易於撫馭自應將猛角猛釐改歸鎮邊廳管轄每年應納差費銀兩卽歸鎮邊廳徵收以昭簡便罕忠邦係鄰近土司葫蘆王係化外夷酋向未歸附此次遵奉札諭從中理處邊境賴以乂安不致激成巨禍顯全大局誠屬可嘉刁金華明白事理不辭勞瘁亦堪嘉尚罕忠邦擬請 賞給宣撫司銜葫蘆王雄長狴狝有上下兩酋此次在事出力係上葫蘆王向無姓氏亦無名字因知 臣等將爲仰乞 恩施乃自取姓名爲胡玉山擬請 賞給土都司銜刁金華擬請 賞給土把總之職准其世襲下猛允土目仍歸孟連土司管轄可否之處出自 逾格鴻慈至護理迤南道劉春霖查辦此案身歷夷疆五閱月恩威互用然費經營籌鎮邊廳參將尉遲東曉親赴各猛撫諭諸夷悉遵約束均屬不無微勞尉遲東曉現因另案傷亡已由 臣等專摺奏報並請 加恩賜卹劉春霖現令督辦鎮邊防剿事務應俟辦理完竣併案奏懇天恩從優獎勵 上諭王文韶諱鈞培奏安插土族事竣請將在事出力土職人等分別獎敘一摺雲



南猛參土目罕榮先與猛角猛董土目罕榮高挾嫌構釁一案經該督撫飭派道員劉春霖等馳赴鎮邊札委猛定土知府罕忠邦等前往開導釐定界限永杜爭端兩造遵依具結完案辦理尙爲妥速所有在事出力之猛定土知府罕忠邦著賞給宣撫司銜上葫蘆王胡玉山著賞給土都司銜孟連下猛允土目刁金華著賞給土把總准其世襲下猛允土目以示獎勵土目罕榮高被罕榮先圍攻未敢挾忿尋仇聽候官爲處置洵屬安分守法著給予土千總管理猛角猛董准其世襲俾昭激勵○甲申諭山東巡撫張曜秉性忠勇歷著勳勳威靈同治年間由知縣從戎創立嵩武軍轉戰河南安徽湖北直隸等省迭克名城剿平粵捻各逆嗣復剿辦甘肅及關外回匪掃穴擒渠戰功甚偉歷受 先朝知遇賞給騎都尉世職賞戴雙眼花翎升授布政使改補總兵擢任提督朕御極後因回疆肅清給予一等輕車都尉加一雲騎尉世職補授廣西巡撫加尙書銜調任山東巡撫於山東黃河尤能悉心督辦親歷河工督率工員力籌修守實屬勤勞罔懈前經迭奉 懿旨命幫辦海軍事務賞加太子少保方翼克享遐齡長承倚畀昨因患病甫經賞假調理遽聞溘逝軫惜殊深張曜著晉贈太子太保入祀賢良祠並於立功省分建立專祠生平戰蹟事實宣付國史館立傳加恩予諡賞銀一千兩治喪由山東藩庫給發照總督例賜恤任內一切處分悉予開復應得恤典該衙門察例具奏題樞回籍時沿途地方官妥爲照料伊子知府張端本著

過有道員缺出請旨簡放主事張端理著賞給員外郎張端璋及伊孫張爾常均著俟及歲時由吏部帶領引見用示篤念盛臣至意○乙酉 上幸頤和園詣 慈寧端佑康頤昭豫莊誠壽恭欽獻皇太后前請安○迴海○以解清京餉予德馨瑞璋方汝巽均加一級○丙戌 上詣 奉先殿 壽皇殿行禮○遺奎垣恭詣 昌陵致祭○以福潤爲山東巡撫○俞奕劻爲崇文門正監督崑岡爲崇文門副監督○俞福銀兼管圓明園三淀事務○以湯聘珍爲山東布政使胡燏棻爲廣西按察使○諭軍機大臣等張曜所部嵩武軍訓練有年所辦皆海防之事著歸李鴻章節制調遣○王文韶譚鈞培奏等於光緒十六年五月具奏土司章天錫擅興行兇積年怙惡派兵剿辦首逆就擒 安定一摺六月十五日內閣奉 上諭辦理尙爲得法在事出力各員准其擇尤酌保毋許冒濫等因欽此又於六月間具奏鎮康土族刁老五乘間搆亂戕殺土官占踞城池卽時撲滅地方安定一摺七月初七日內閣奉 上諭辦理尙爲妥速在事出力官紳著准其擇尤保獎毋許冒濫等因欽此又具奏官軍剿辦越南游匪魏名高連獲勝仗邊境肅清一摺七月二十日內閣奉 上諭辦理尙爲得力所有在事出力各員自應量予獎勵餘著照所議辦理等因欽此仰見 朝廷激勵戎行有勞必錄祇領之下欽感同深節次恭錄 諭旨轉行欽遵辦理去後隨據各營將領及該管道府廳將在事出力各員開列職名陸續稟請獎敘等情遵送

次諭旨批飭善後局司道再三考察從嚴刪汰擇其尤爲出力之文武員紳分案開單詳請奏獎前來臣等查章天錫以私獎土司貢隅自大虐民罔上抗拒官兵若辦理稍涉遲延恐他族土司相率效尤實爲滇閩沿邊巨患刁寇五以回匪餘孽倖逃法網輒敢蓄謀作亂乘鎮康土知州外出戕官踞城若待其布置已周勢必大興兵力魏名高以受撫難民潛謀不軌既與防營潛攻土署倘當時稍有疏虞俾得踞爲巢穴越南密邇邊禍將防不勝防所幸該文武等赴機迅速調度有方各營將領激勵士卒奮勇爭先或擒斬首要改土歸流或克復城池興滅繼絕或殄除反側固圉安邊或搜剿於箐密山深之地或鏖戰於蠻烟瘴雨之鄉無不履險蹈危同心戮力卒使元惡授首迅奏膚功兇頑一律殲除邊徼悉臻安堵洵足上伸國法下快人心所有歷次在事人員實屬異常出力詳加考核並無浮冒謹按照勞績之等差酌量保獎之輕重各就各案分繕清單恭呈御覽合無仰懇天恩俯准照請給獎以昭激勵出自逾格鴻慈得旨該部議奏單三件片二件併發○丁亥李瀚章奏兩廣鐵斤免納稅釐三年期滿應請開徵得旨如所請行○戊子以徐用儀捐田贍族賞給御書匾額○裕祿奏捐納勞績兩項人員請暫停分發下吏部議奏○裕鄧川等州縣被災田糧○譚鈞培奏據署宣威州知州馬龍稟報本年五月十二日夜大雨傾盆河水暴漲沿河大營中和莊等村圩堤衝決淹壞田地千餘畝已栽秧苗盡被沙石積

壓懇請籌帑賑濟委勘辦理又據永善縣知縣安寶宸稟稱四月十三日夜雪金頂等處突被雹災繼以大雨水暴發人民廬舍均被衝沒田地淤湮懇委賑勘各等情當經臣先後行司籌款委員馳往並責成該管道府督飭印委各員逐一查勘妥爲撫恤毋令一夫失所現在時節尙早並令督飭農民趕將衝塌圩堤及時修築疏通積水挑濬沙石補種晚稻雜糧以資秋收接濟仍分別村莊區圖先行造冊詳候備查錢糧應否蠲緩統俟秋後由各地方官覆勘成災輕重再行照例辦理得旨知道了卽著飭屬妥爲撫恤毋令失所○諭軍機大臣等有人奏各省教案迭出請飭嚴辦保甲一摺據稱沿江一帶會匪最多常德漢口大通蕪湖鎮江清江浦周家口皆商賈薈萃之區匪徒易於匿跡請飭各省擇尤舉辦保甲等語保甲爲弭盜良法如果實力奉行何至會匪游勇結黨滋事層見迭出著沈秉成督飭各屬認真舉辦不得因循廢弛視爲具文亦不得任令胥役藉端騷擾務使會匪無所潛蹤俾免句煽爲患是爲至要原摺著鈔給閱看將此各諭令知之○己丑 上幸頤和園詣 慈禧端佑康頤昭豫莊誠壽恭欽獻皇太后前請安○還海○予故泗州直隸州知州方瑞蘭政蹟交國史館立傳○庚寅劉坤一剛毅奏准部咨山東巡撫張曜奏本屆河運漕船回空請由南省委員自行催趲過有水淺之處酌量挑挖一片欽奉 硃批著該撫咨行劉坤一等轉飭照辦欽此咨行遵照等因當經轉行去後茲據江安糧道馬恩晉江

蘇糧道景星會詳稱河運回空漕船關繫次年新漕歷屆重船行至通州交米完竣每兩幫專委佐雜一員管押南下另派牧令一員督押催糧沿途不准逗遛然每逢新運開局之日船多未集水次另僱舨難昔年曾因黃水遷移回空艱阻每值各船冒險航海或至次年南歸嗣雖航海有禁而回空各船俱以北路運河淤淺太甚拖攔致損視為畏途今屆回空挑河事宜若改歸押空委員臨時舉辦實恐事多窒礙貽誤新漕查漕船抵通州交兌為期遲早視渡黃之遲速為准倘官汛較晚節候已遲雖日夜督催猶恐不能尅期南下若遇有淤淺之處責令停船挑濬勢必久延時日北地苦寒設或阻凍難歸不獨需費較繁抑且耽誤新運此窒礙難行者一也運河受淤水勢必小若俟船轉該處始行疏濬須將各船擇一深塘聚泊然後築壩截流始能勘估興辦無論船隻較多一塘不能容受即使分幫停泊而河水消涸之際深塘無幾實有勝舟之虞且眾船聚泊一處風高物燥在在可慮此窒礙難行者二也本屆江北江蘇漕船有九百號之多水手幾至萬人難保無狡黠好事者混跡其間若船久泊河干深恐游手好閒恃眾滋事且押空委員奉差異地辦理一切呼應不靈卽以僱夫而論由地方承僱每名日給京錢一百六十文押空委員承僱必須日給錢二百四十文拉溜地壩事事皆然以工作而論由地方官承辦日可出土十方者委員承辦日僅出土六七方功倍事半積習已深同是公家之款同辦公家之事而遲速各判難易

迥殊此窒礙難行者三也至回空所載貨物例按原裝米數准帶二成定章已久雖云體恤亦具深心各該船戶既有成本在船孰不願趕緊南下急圖銷售斷不肯有意遲延若謂任情裝載藉口留難各該地方官儘可會同押空委員指名查究該撫原奏所稱恣意刁難一節似可毋庸過慮且近年南北運河兩岸堤身間有潰決欲籌蓄水必先築堤若已成押空委員於回空之際遇有淤淺河道臨時興挑實恐趕辦不及如謂籌款艱難或請酌量撥款總須由山東各地方官先事籌辦庶可無誤新漕等情詳請具奏前來臣等察核所詳實爲力顧新漕起見回空河道山東可以豫籌於先事江蘇祇能趕辦於臨時且江蘇押空各員人地生疏非若山東各地方官熟悉情形便於呼應兩相比較自以仍歸山東承辦爲宜查光緒十二年江北江蘇回空漕船行至阿城適值黃水衝決運口淤沙填塞十有餘里不能出口入黃押空各員因地處隔省無從措手經東昌府知府派員經理始得連橋南下是以十三年六月前督臣曾國荃鑒及上屆回空之難豫籌辦法奏請將淤淺處所由山東省撥款經理欽奉 諭旨允准欽遵辦理本屆事同一律相應請 旨飭下東河督臣山東撫臣仍飭該管河道各員循照舊章將境內淤淺各工豫爲勘估興辦務須一律挑挖深通並將各缺口分別堵築堅實俾回空各船得以暢行無阻及早南歸接運新漕以免遲誤得 旨卽著該督撫咨行許振禕福潤遵照舊章辦理

八月壬辰朔予樂亭縣書儒史夢蘭四品卿銜○予故記名總兵劉祺優卹並附祀准軍昭忠祠○李鴻章奏查順直各屬無糧黑地官荒民荒私墾墾種者爲數猶少其旗圈地畝迷失多年無租無糧之地幾於接陌連阡更有旗產一項從前旗人私自典賣民人私自承種年代久遠輾轉多年無從究其來歷自兩次弛禁交產以後屢飭稟報升科苦於吏胥勒索勘辦稽延相率觀望查辦終無起色近年勢豪土痞藉端挾制而墾種之戶多爲若輩魚肉經界不正獄訟繁興旗民因之交困戶部洞悉此弊光緒十三年三月酌擬順直各屬議租議賦章程聲明若不因時制宜恐畿輔數千頃公私地畝租賦全歸無著奏准嚴飭各州縣遵照辦理臣因事關全省利害必須妥慎籌辦方可推行盡利當經斟酌民情事理酌量變通辦法期與部章民隱兩不相礙咨部核准飭令各屬自十五年五月起一體實心查辦並嚴禁書役索擾留難一洗從前錮習小民方樂於從事紛紛首報多而且速查勘明確卽行議定租賦咨部頒照收執旋准部咨光緒十五年十二月二十八日奉 上諭嗣後宗室八旗京屯田產無論老圈自置永遠不准賣與民人至從前民置旗地已經升科報部者仍准執業其已投稅升科尚未報部及已經交產有契尚未投稅升科者均自此次降旨之日起予限六箇月一律升科等因欽此仰見 聖主於顧念根本之中仍寓體恤閭閻之意凡在臣民同深欽感卽飭各屬出示嚴禁規復舊制以保旗人生計其民置旗地

在奉 旨以前催令一律升科嗣因旗產限滿尙有多案未結奏明於定限六箇月之外再行展限一年俾澈底清查以裕賦課現因正展各限截至本年五月底屆滿據藩司裕長將查辦各項荒地並旗產升科頃畝銀數開摺詳報前來 臣查光緒十五年五月起至是年年底止查出順直各項地畝原報三千餘頃內除順屬各州縣詳辦未結新舊各案共地一千一百五十七頃餘畝土草房十六間莊窠十二塊已由司詳經府尹 臣自行核辦外計由司造冊達部核准頒照官荒旗荒民荒共地一千二百八十四頃一十畝零每年應徵正耗銀五千四百五十八兩零旗產地一千一百四頃九十二畝零共徵正耗銀三千二百六十八兩零又自十六年正月起至十七年五月底止查出直屬共造冊達部核准官荒旗荒民荒共地一千五百四十一頃四十二畝零每年應徵正耗銀六千八百三十七兩零旗產地四百六十頃五十一畝零共徵正耗銀九百二十五兩零統計查出各項地畝除由順天飭辦一千一百五十七畝餘不計外實由司造冊達部核准官荒旗荒民荒旗產地四千三百九十頃九十五畝零每年共徵正耗銀一萬六千四百八十八兩零第自十六年起閱時十八月之久升科地畝雖有二千餘頃究不及十五年之首報踴躍報出旗產爲數更屬無多推原其故委因上年夏間旗產展限後大雨決旬各河漫決順直災歉州縣計有九十八處地畝被水淹佔刻下尙有未經澍復者無論老荒新墾不便催令升科各牧令



籌辦賑撫招集流亡並有應修河堤要工實亦不遑兼顧不特荒地未報者尙多卽旗產已經投稅尙未升科及交產有契尙未投稅者正復不少況有外出未歸之戶禁令未盡周知若因已逾期限不准升科勢必隱匿不報租賦轉致無著且恐捏報黑地流弊滋多臣督飭藩司察酌情形應請自此次限滿後如有首報升科查係置買立契年月實在此次禁止交產以前證據確實並非無故不報者仍准隨時升科若係無故不報及有捏報荒地情弊一經查出卽照部章同各項荒地一律追繳花利撤地入官從嚴懲處庶良民得所措手奸民亦知畏憚一切隱匿影射之弊不禁自除且於國課民生兩有裨益至該管各官察出隱地二十頃以上例得按畝記敘其清出旗地在一百頃以上依限納稅升科按照戶部定章准其保奏請旨酌加優敘今順直各屬查報地畝較多之各州縣盡心清理有裨正供未便沒其微勞仰懇天恩俯准臣等查照例章奏獎以昭激勸等因欽此○旨勸辦地畝係地方官應辦之事所請獎敘之處著毋庸議○癸巳命奕劻總理海軍事務定安劉坤一幫辦海軍事務○諭裕祿等奏昭陵碑樓等應修各工請擇吉興修一摺著欽天監於本年八月內選擇吉期先行知照著盛京將軍會同工部侍郎屆期敬謹興修○張煦奏鳳聞淑浦縣地方有匪徒焚香劫獄情事因該縣向無城垣恐致居民被擾且恐日久蔓延釀成巨患當即飛飭統帶毅安三營之記名總兵劉福興親帶防勇馳往督同駐防該縣江

口之弁勇彈壓查拿並飭辰州府知府夏玉胡淑浦縣知縣文光宸查明滋事實情形速即稟覆旋據先後稟覆到臣伏查湖南會匪實繁有徒雖經隨時懲辦總未盡絕根株此案嚴嗣舜等在鄉擄害良民係地方應行拿辦之犯乃因該縣無城致被宵夜糾夥闖入衙署放火劫獄搶劫傷斃團首丁役並拒傷汛弁實屬愆不畏法雖後追捕格殺四名擒獲十二名訊明懲辦尙知愧奮惟事前疏於防範咎無可辭相應請旨將淑浦縣知縣文光宸典史汪廷燦先行交部議處勒限一箇月上緊嚴拿限滿有無弋獲再行照例參辦得旨文光宸汪廷燦均著先行交部議處仍勒限嚴拿逸犯務獲懲辦餘依議該部知道○甲午奎斌奏調理藩院員外郎潤樸來口辦理牧地得旨清查牧地並非緊要事件所請著不准行○奎斌永德奏奴才奎斌於上月查獲烏里雅蘇臺將軍托克滿參案附陳臺站苦累亟須整頓情形欽奉諭旨卽著該都統悉心酌核妥議具奏等因欽此仰見聖明軫恤邊氓肅清郵政之至意查奴才衙門所轄阿爾泰軍臺額設四十四站係烏里雅蘇臺等處及外蒙古來往衝途凡馳驛大小官員以及換防弁兵公文摺報均由此經過差務本極稠密更增以庫倫駐防練軍供億益繁始猶勉力支持近則日形竭蹶駝馬疲於奔走略無休養之期人丁困於送迎復有誅求之酷而臺站至今日遂苦累極矣奴才等詳察情形細心酌核推原其弊約有二端一由各城馳驛之例外需索也一由各盟幫臺之託故

游差也查幫臺不到節經歷任都統及奴才承德護理任內迭次奏催現雖有陸續撥送者惟圖什葉圖  
漢部落至今闕然本臺額設駝馬無多獨力支差何以持久除由奴才等酌擬辦法另片具陳請 飭理  
藩院核議外惟濫行馳驛例外需索實爲近日臺站第一弊端而應切實清釐規復舊章變通盡善查理  
藩院郵政例載馳驛官員均按品級支給馬匹羊隻兵部勘合亦標明騎馬數目定制綦嚴無如每遇將  
軍大臣赴任該處必派兵弁多人至京迎接及將出口該將軍等開具所需駝馬廐羊數目由奴才衙門  
發給傳單相沿已數十年幾如成例迨行至各臺於傳單外駝馬復任意加增廐羊亦沿途折價且有包  
運口內商貨攬帶行人藉此漁利之事該大臣等身受厚恩渙膺顯秩宜知自愛或不肯覲顏爲此而隨  
行兵弁積慣走差稔習蒙情尤工勒索機變百出防不勝防此在顧恤大體者僅能廉介自持而如已革  
將軍托克湍者竟至以朋黨敗檢損 朝廷之威重滋蒙民之口實抑又甚焉他如由京派出換防官員  
亦多以蒙古謹厚可欺恣行婪索少不如意鞭筆立施臺站既疲累不堪而蒙民生計亦因之重困矣至  
口外回差向由該將軍大臣等自發傳單核其所傳數目均不遵照例章竟有視出口時更加甚者然大  
員往返終歲無多京旋換班亦非恆事所最爲臺站苦害者莫如烏里雅蘇臺科布多庫倫三處各項雜  
差亦復濫行馳驛此來彼往無日無之上官既藉差遣爲市惠之端差員亦視臺站爲生財之藪甚至一

採辦紙筆而奉委或至數人一關領銷銀而催提竟至層起並有不能指實之事率稱公幹者絡繹不絕  
頻年供億其何以堪且蒙古苦累非特奴才所屬四十四站爲然也卽如烏里雅蘇臺科布多庫倫綏遠  
城以及西北路各扎薩克之有關臺站旗分者莫不財殫力竭生計索然近年蒙古積弱未必不由於此  
溯查同治年間西北軍興征調日棘各臺力窮供億竟有潰散者賴奏撥帑金前後需款至百餘萬兩之  
多始克招集散亡復通郵驛現當無事之時若不亟爲整頓稍留餘地俾有生機設遇緩急其患何可勝  
言前事之不忘固宜殷鑒也奴才等統籌全局不敢不披瀝直陳謹擬章程八條恭呈 御覽仰懇 飭  
下戶兵二部理藩院覆核咨行各城將軍大臣及奴才等一體遵照現在護理烏里雅蘇臺將軍崇歡科  
布多參贊大臣魁福庫倫辦事大臣安德等志切匡時必能遵奉部章共持大局倘奉差人員尙有陽奉  
陰違於定章之外別立名目仍前婪索者應由各將軍大臣暨奴才等互相稽察隨時糾參庶挽頹風而  
除積弊再本年口外各臺六月中旬始得透雨青苁甫生疲累情形刻下尤甚章程一日不定差務一日  
不能輕減並懇 天恩飭該衙門速議施行蒙民幸甚此外尙有未盡事宜容俟辦有端緒續行陳奏合  
併聲明得 旨該衙門速議具奏單併發○丙申魏光燾奏溫宿州被雹鎮西廳被水報聞○丁酉阿克  
丹奏庫存鉛丸無多援案仿製得 旨如所請行○裕祿奏派內城協領恩慶與朝鮮官會哨報聞○以

頤爾克舒諾爲烏梁海散秩大臣○戊戌祭社稷壇上親詣行禮○福潤奏城守尉樂福自用洋鎗傷遺缺請簡得旨案關大員自戕著福潤會同德克吉訥提案嚴訊務得確情勿稍含混該衙門知道○己亥予年屆百齡五世同堂之南海縣壽民謝學南旌表並賞銀段○諭朕恭讀世祖章皇帝御製勸善要言一再仰體天心特垂明訓精詳切實俾斯世遵善改過一道同風實足挽澆浮而臻盛化惟原編祇有清文特命編書房加譯漢文發交武英殿刊刷成書茲據奏刷印完竣裝潢呈覽著每省頒發一部交該將軍督撫照式刊發各屬學宮每月朔望同聖諭廣訓一體敬謹宣講用示朕欽承祖訓輔教順民之至意並著賞給軍機大臣世鐸額勒和布張之萬許庚身孫毓汶御前大臣伯彥訥謨帖齊祺奕劻毓慶宮行走翁同龢孫家鼐松淮上書房行走徐桐徐會灃王文錦李培元張仁黼高廣恩南書房行走徐郙李文田陸潤庠大學士直隸總督李鴻章各一部○致仕大學士寶璽卒贈太保入祀賢良祠並予諡賞其子光祿寺少卿景灃以四品京堂候補孫蔭桓舉人○庚子前任福州將軍慶春卒賜卹如例○辛丑上詣泰先殿壽皇殿行禮○以薛福成爲大理寺卿○以福建候補道孫雪捐助直賑交軍機處存記○以運河道耆安挽漕出力賞二品銜○劉坤一奏已革山西冀寧道王定安雲南迤南道許繼衡才力堪用得旨均著交吏部帶領引見○唐炯奏據公司具報平彝威寧兩銅廠續

有礮礮發堂惟礮雖多成分尙薄現自五月以來雨水連續礮鑪不能施工已嚴飭一俟晴霽務將十一起頭批京銅五十萬斤於年內辦足起解免佔下年地步以期逐漸加增至公司承辦貴州辛卯兩起京運白鉛已解四十餘萬斤黑鉛十餘萬斤亦因雨水過多百座長鑪停至大半又山溪漲發橋梁坍塌駝馬艱行轉運不無阻滯已嚴限七月內辦足屆時當咨貴州撫由黔委員起解約計年內尙可辦足五十萬不至短少下戶部知之○壬寅遣恩常恭詣福陵致祭○崧駿奏浙江省台州地方員山面海夙爲盜匪淵藪經各前撫暨奴才嚴飭文武會拿屢有斬獲於年終開單奏報在案特以匪黨衆多誅不勝誅漏網尙復不少本年三月間台屬黃巖仙居二縣與溫屬永嘉樂清二縣連界地方土匪肆擾經統領溫台防營海門鎮總兵楊岐珍抽調防軍親督會剿而台屬北岸著匪麻面度人本爲積年渠魁購捕未獲此時地方稍虛卽乘隙勾結黨與潛謀滋事楊岐珍預料及此密飭親兵右營幫帶陳得昌暨右營哨弁黃崇良等各帶水陸勇營嚴爲整備四月十一日探報該匪糾黨聚集木坑塘嶼內陳得昌等卽率勇掩捕該匪抵拒不支下海竄逸陳得昌復會同黃崇良等於十五日督率兵船追拿該匪率領數船迎頭對敵鎗礮互施閱兩時之久黃崇良親督什長金守標等向前直撲逼擒匪船匪等猶抵死抗拒登時擊斃匪首麻面度人並奪獲匪船兩隻洋鎗十餘桿又藥彈火礮等物餘匪紛紛跳水逃竄溺斃

二十餘名我軍什長金守標勇丁陳金山柯登雲亦各被拒受傷等情由楊岐珍具報前來伏查該匪麻面度人犯案疊疊稔惡已久今敢乘隙勾結黨與狡為思逞實屬罪大惡極雖已殛斃仍飭戮屍示眾至在事文武各員弁或密為偵探或水路兜拿均能奮不顧身殲厥巨匪洵屬異常出力年來溫台各屬土匪屢有萌擒祇以剿捕匪類本為地方文武專職未敢以區區微勞率請獎敘此次該匪潛結思逞為禍不測幸得該員弁等始力撲捕繼復爭命於賊濤巨浪之中殲滅殆盡不致釀成巨患辦理甚為得手似非擇尤保獎不足以作士氣而策將來可否仰懇 天恩逾格俯准擇尤酌保以示鼓勵之處伏候 聖裁得 旨著准其酌保數員毋許冒濫仍飭嚴拿逸匪務獲究辦該部知道○乙巳予故大學士寶鑒諡曰文靖故山東巡撫張曜諡曰勤果○予故湖南提督周盛傳於江甯建祠列入祀典○丙午卞寶第奏續減鹽釐請再展限三年下戶部議奏○丁未李鴻章奏據河間縣在籍紳士前雲南陸涼州知州劉啟國等聯名呈請滹沱河為直隸五大河之一猛悍不受堤防上游深武饒安下游任雄勳保文大十餘州縣均受汎濫之害而河間適當其衝往年每遇猛漲農田盡成澤國自光緒七年前任清河道史克寬相度形勢始於獻縣新闢減河使滹沱仍歸子牙故道達津入海從此十數州縣始免成災迄今十年河流順軌農民復業追維利賴之澤實該前道之功前於被議去官時紳民等曾於十方院建立去思碑

以誌愛戴茲聞遠近感激同深紳等追念前勞合詞籲懇奏乞 恩施開復原官以慰眾望等情並據任邱等縣紳民聯名呈請由該地方官具詳請奏前來臣查史克寬久從淮軍剿辦粵捻轉戰南北卓著勦勞其在清河道任內因升任太常寺卿徐樹銘查辦獻縣河工以該故道所挑新河水勢不順致南岸各村兩後被災奏請交部議處旋經部議革職查泚沱下游本歸子牙河自同治七年北徙漫入古羊河河身淺窄橫流四溢於是深州饒陽獻縣河間肅寧任邱雄縣保定極受其災光緒七年臣派該故道前往勘度在獻縣開挖泚沱新河挽歸子牙故道然後沿河州縣始登衽席至南岸各村地居窪下向被水患非自開河以後始然斷不能僅顧一隅數十村莊而置上下游十餘州縣民生於不問徐樹銘奏請改道實非通籌全局之言嗣後迭據各州縣紛紛呈訴俱謂新河有益改道有害旋奉 旨交臣議覆仍照史克寬所開河道辦法至今便之其詳細情形臣於七年奏開新河及九年十年迭次覆奏案內並已縷晰上聞是該故道辦理尚未乖方被參不無冤抑茲據該紳民等呈詞懇切足見遺愛未泯公論在人合無仰懇 天恩俯准將已故革職清河道史克寬開復原官以順輿情而彰勳績出自 慈施逾格允之○戊申李鴻章奏青龍海城河前因淤墊過高河身狹隘兩岸舊堤亦多坍塌以致上年河水漲發堤岸潰決寶坻全境民田受害最深本年臣與兼府尹臣往返函商咨行直隸提督葉志超通承鎮總兵吳育



仁督率北塘蘆臺所部淮練各營分段挑濬加培並將辦理情形附片奏陳並請俟工竣時按照河工章程出力人員擇尤保獎奉 旨允准欽遵在案茲據該提督等呈報工程完竣臣派署天津鎮總兵吳殿元馳往詳細驗收所挑河工三十五段一律寬深盛漲足資容納加培堤岸四十六段亦皆高厚堅固並無草率偷減現在河流暢順稔慶安瀾附近農田均保豐收實於運道民生大有裨益據該提督等查明在事出力員弁開單請奏前來臣查此次挑河築堤地段綿亘六十餘里工程艱鉅各該員奔走於炎天烈日之中胼胝泥塗櫛風沐雨洵屬異常勞苦查核單開各員尚無冒濫所請獎敘亦與章程相符謹繕清單恭呈 御覽仰懇 天恩俯准照擬給獎以示鼓勵直隸提督葉志超通永鎮總兵吳育仁新授河南歸德鎮總兵楊玉書躬親督率倍著勛勞葉志超擬請 賞給頭品頂戴吳育仁擬請 賞給提督銜楊玉書擬請 飭部從優議敘其應給千把等項照章咨部註冊下部議奏○己酉以曹正興爲浙江處州鎮總兵○派教信張隨相承修正陽門城牆等處工程○于故陝甘總督楊岳斌於安徽當塗縣采石地方建祠○庚戌遺春煦恭詣 永陵致祭○裕嵩明南賓等州縣被災田糧○諭鳳鳴等奏考生舞弊請飭查辦一摺據稱本月十六日明遠樓下檢複卷夾一箇內有稟詞稱係順天府大興縣生員楊悅山來京投卷因欠歲考除名不得錄科適有青縣生員孫學文頃場後患病託其入場伊即代爲完卷並將

文卷等件呈驗卽飭查拿該生已交卷出場結展拿究辦等語案關科場舞弊亟應澈底根究著步軍統領衙門順天府五城御史直隸總督卽將楊悅山孫學文一體嚴拿務獲解交刑部嚴行審訊照例懲辦該部知道○辛亥劉坤一剛毅奏本年四月間安徽無湖教堂被匪造謠焚燬後江蘇之丹陽金匱無錫陽湖江陰如皋各屬教堂接踵被焚被燬派員前往查辦雖滋事情形輕重不一要皆由於匪徒潛匿捏造無根之言煽惑愚民聚眾滋鬧意圖藉端肆擾乘機焚搶以致迭釀鉅案此外各屬亦復謠言四起並有張貼揭帖情事等查各國教士在中國設堂傳教爲條約所准行兼辦育嬰設立義學亦無非好行其善該匪徒等膽敢無端造謠肆行滋擾若不拿拿嚴辦解釋民疑不獨民教難以相安亦實爲地方之害據報後節經嚴札通飭各屬將境內所有教堂務須實力保護一面嚴拿造謠滋事匪犯按律重辦並由臣坤一疊次剴切示諭飭令各屬傳集地方紳董各向就地居民傳諭誥誡毋得輕聽浮言妄生猜忌各該縣未能先事豫防究屬咎有應得蘇屬案係由丹陽首先滋事將該縣查文清甄別參革著無錫縣劉樹仁著江陰縣孫貽紳陽湖縣葉懷習金匱縣湯曜均摘去頂戴代理如皋縣莫炳琪到任甫及三月予以記過並將該管汛弁一律摘去頂戴示懲欽奉 諭旨後又經臣等分別詳細出示曉諭此等造謠滋事之匪極爲詭秘行跡飄忽緝捕較難臣坤一復密派員弁四處訪緝並令各州縣清查保甲數月以

來地方漸已安謐竊維籌辦善後以輯治民教爲第一要義拿辦匪犯必須情真罪當方足以昭折服而安民教據各屬先後稟報拿獲各犯訊係均祇在場附和飭令會同委員一再研訊加以刑嚇矢口不移現已各按情罪分別軍流徒杖從重定擬各教堂燬失屋物若待著追賠償勢必稽延時日無以安教士之心已飭據常鎮道黃祖絡督飭印委各員籌撥款項與各教士分別一律擬結並仍嚴飭該管道府督飭各屬勒拿首要各匪務獲懲辦以期仰副 聖朝輯睦邦交綏靖地方之至意得 旨仍著展拿逸匪務獲究辦該衙門知道○壬子升奏 奴才前將議覆印度意見十四條暨藏番不遵開導請仍照前議亞東立市辦理情形具奏並另備公函將印度意見及 奴才議覆各條錄呈總理衙門各在案茲於六月十四日由邊務委員黃紹勳張昉轉據赫政遞來譯出保爾分晰陳明印度完結後三款意見各條 奴才詳加查核內以改關爲主而以游歷錯綜其間積慮處心期以得入藏境爲準當經譯行商上連日派員開導茲由商上轉據三大寺及僧俗大眾遞具聯名圖記公稟敘稱通商游歷所在將來卽爲英國之地獨有極西金已有明證無論如何誓不遵依等情前來言內並指斥 奴才以爲失信藏番見好英國令人無詞以對謹據藏番稟覆情形逐條議覆敢將不得已之苦衷縷晰爲我 皇上陳之竊查西藏自光緒二三年卽奉飭辦理通商游歷又於十二年欽奉 諭旨飭辦英國通商游歷歷經藏臣開導迄未遵依

十四年奴才到任赴邊解職仰承 廟謨開導番衆飭令通商舌敵膏焦藏番稍有覺悟良由隆吐失利番情震恐始有此一綫辦法奴才亦不敢以口舌爲功始而只允邊界外通商再四開導方允邊界左右通商爰定亞東立市之議此奴才於十四年冬間十五年春間曾與保爾赫政前後反覆議論取具夷結奏明定案之實在情形也今春印度復派保爾會議後三款忽更前議欲在法利立市法利卽今茲之所謂帕克哩也奴才開導商上并游歷各條不肯遵依前經議覆在案此次遞來分晰各條立意甚堅虛聲恫喝直指藏人並無生疑之事亦似奴才主持不願者不知亞東立市番情已覺勉強取結定案前已費盡心力奴才回藏後藏番會同三大寺僧衆攀轅遞遞咸謂奴才有心見好辦理不公當經竭誠開導始無異議今印度欲更前議適啟猜疑窺其狡焉思逞之謀尙不止注意帕克哩江致其分陳第三條內或在通北各地方一語以爲將來通商游歷張本係指納金納官而言卽奴才前奏所稱納金距扎什倫布僅三日程請增兵駐守之一帶地方也隆吐爲藏南門戶一經失去罅漏中開尙賴亞東一段有險可據若改關帕克哩等處險要全失便可長驅西藏阻滯毫無殊非藉固吾圉之計姑不具論而目下藏番以失信責奴才以衆議拒改關開導萬端迄無轉意而英人不顧時勢虛聲恫喝奴才智盡能索調停無術再四思維惟有懇祈 飭下總理衙門妥商駐京英使轉電印督告以改關游歷爲目前萬做不到之事

藏番愚頑毋庸動引約章仍照前議在亞東立市抵關貿易以免藏人疑貳礙難辦理一俟立市定在亞東所有商務事宜應如何派員辦理之處統候總理衙門飭知核辦下該衙門知之○癸丑劉秉璋奏再辦通省捐輸一次得旨如所請行○甲寅上詣壽皇殿行禮○遣載卓恭詣泰陵致祭○諭李瀚章奏兩省知縣各執一詞道員吳世榮未訊供詞先定稟稿並爲王粗皮預寫甘結因粵省委員不肯照辦遂經王崧以不服查訊之罪與卞寶第前奏情形迥不相同亟應澈底根究以成信讞著希元將案內人證秉公研訊按律定擬具奏毋稍徇徇原摺著鈔給閱看○乙卯予故廣東水師提督方耀卹蔭並將事蹟交國史館立傳○予積勞病故之參將定長優卹○許振祿奏向例河工以白露爲小安嗣屆期率屬虛中報祀緣過此節臨霜降差無意外之虞查今歲河流順軌實爲十數年來所未曾見以山我皇上聖德格天故爾百靈効順不復報險以煩聖慮在微臣與道屬諸員初意亦不敢倖冀遂能如此輒將兩岸得有之險悉力補葺將生之險預爲防杜而於楚澤大堤及楊橋等處尤極意維持豈期大溜竟直趨中洪兩岸得遂無事吏民歡慶此則事機之順曾爲歷年未有而大小工員絕不敢濫竊其功者也臣觀今日河工實如積病久病之身當以培補元氣爲第一義人之培補在慎寒暑節飲食日求卻疾疾自當減而不必購奇藥以延年河之培補在儲工料去浮濫時思防險險自默除而不必增鉅款以

滿事臣猥以庸才舉行下策但願責之以實持之以恆不敢欺 君父而負 神明或可竭愚忱而免愆  
戾計出月即交霜清河流自可穩定臣仍督率道廳營汛加慎巡防以仰副 聖主慮念河防之至意報  
聞○丙辰崧駿奏東防塘工被潮衝卸請俟秋後估辦下工部知之○裕寬奏臨漳縣知縣連英公事從  
無貽誤不意陡發瘋迷致傷其妻殞命請革職提審得 旨如所請行○丁巳子故浙江處州鎮總兵賈  
如田照軍營立功後積勞病故例議卹○周達武奏奴才前於同治年間辦理四川貴州軍務迭平巨股  
先後保獎文武員弁最多自刊博奇巴圖魯滿篆文小戳記凡繕發行知時加印札內以昭慎重在案連  
年以來各省假咨投標者不一而足奴才前已酌定收標章程咨請各省嚴查去後本年聞四川陽華縣  
在省城拿獲奸徒王姓等起獲假印十九顆並功牌行知各木板內有假造甘肅提督印暨奴才銜名發  
過黔省所屬麻哈州香山八寨三案行知木板其印篆戳記無不畢肖又准護理貴州巡撫黃槐森  
咨知貴州下江地方亦拿獲奸匪起出假印數顆內有總統武字全軍貴州提督行營假關防並行知板  
片各等情除匪徒應由該各省飭辦外伏查該匪徒既假造印信印板甚多其售出偽印文札想亦不少  
輾轉相訛流弊何極又有自己保札身後賣與同姓者如補用總兵周正球昔隸武軍歷保斯職光緒十  
年在籍病故伊姪將保札賣去經湖廣督臣卞寶第咨詢來甘比卽查明年歲籍貫不符已經咨覆接署

督臣裕祿訊明按律懲辦具奏在案本年七月內又准閩浙總督卞寶第來咨有儘先都司劉爲美投標行查保案到甘當查得部武軍營內原有劉爲美其人歷戰出力洊保升用總兵同治七年已經因傷身故今劉爲美只持都司獎札投標顯係頂冒亦經加緊咨覆飭究近來此風甚熾屢有呈投甘肅提標者請驗保札核其立功年紀尙在十歲以內當將該保札當堂銷燬澈底究辦而後來者何多如是祇因咸豐同治年間軍務繼起保舉甚多並未造有年貌籍貫清冊遠部以至多所混冒似此巧詐日開行險徼倖苟不嚴爲杜絕仕途雜進伊於何底擬請 旨飭下各省督撫提鎮嗣後凡有執印文印札呈請投標員弁先行詳驗獎札細按年貌並飭造行走事跡履歷清冊咨移原保大臣並立功省分核案相符咨覆至日再行取其同鄉官保結方准收錄以免假冒得 旨卽著周達武移咨各省督撫提鎮詳查辦理該部知道○庚申李瀚章奏粵東盜風素熾於光緒十五年十一月間將南海等縣緝捕事宜歸水師提督臣方曜籌辦並 臣添派委員認真防緝當將妥籌整頓情形奏奉 硃批該部知道欽此恭錄轉行欽遵嗣據香山新會兩縣稟請將所獲積匪亦交方曜行營訊辦節經批准咨行所有光緒十五年十一月開辦起至十六年十二月止拿辦積匪名數並查辦情形業經先後奏報在案旋准方曜咨稱親督各路員弁兵勇馳赴南海等縣肅清該鄉房族各長捆匪送究一面聯合沿海河團河艇整飭原有拖船扒船

遇有盜匪協力兜拿計自十七年正月起至五月止先後據各鄉族遵交及各營弁暨各縣拿獲各項匪犯龐亞仔等共一百七十六名或據供認迭次強劫得贓據人勒贖及向基園碑審等處打單勒收行水或據供認迭次拒斃事主及設立堂名打單嚇詐得贓據人勒贖均係素行不法兇暴聚黨詳詢鄉族指為積匪經督同隨營審案各委員先後覆訊明確錄供咨經臣核飭在行營就地正法山臬司彙案詳請具奏前來臣伏查廣州府屬南海番禺順德香山新會各縣劇盜素多兇橫此次獲案各匪均訊係罪惡昭著法無可貸業已照例懲辦謹繕具名數案由清單恭呈 御覽其在逃匪犯榜列姓名懸立重賞令該鄉族遠近周知並令隨時認真稽查報務期有犯必獲現在各州縣盜案稀少辦有成效在事文武員弁官紳時未半載獲盜較多匪徒因而斂跡良民得以久安洵屬緝捕勤奮似未便沒其微勞合無仰懇 天恩俯准 查明出力員弁擇尤酌保數員以示鼓勵之處出自 逾格恩施得 旨著准其擇尤酌保數員毋許冒濫該部知道單併發○辛酉李瀚章奏廣東雷瓊兩府均係海疆要區盜風素熾往往拜會結盟勾引海盜恣行焚掠臣稔知其害嚴飭該管文武認真查緝遇有大股匪徒立即帶隊剿捕不准稍懈光緒十六年十月間雷瓊道朱采訪聞遂溪縣西海地方有漏網會匪楊春亭等拜會結盟焚劫村舍海洋盜匪乘機肆起至遂溪之紅江埗滋事又有另股匪徒搶據民船在徐聞瓊山兩縣海峽之間



往來游弋伺劫商民並據各營縣稟報前來朱采與署瓊州鎮總兵李先義商定辦法分投剿捕李先義親率兵輪管帶官陳良傑等駛赴遂溪紅江埠賊船連檣屯紮殊不爲動陳良傑督隊直前鎗礮齊發賊船開礮抵拒相持兩時之久擊斃悍匪陳亞幅等十餘名受傷落水者甚多賊勢不支紛紛泗水逃遁生擒十二名奪獲賊船兩隻救出擄禁男婦十三名一面分派守備張煊李森鄧學賓千總王肇元把總吳懋德等會同地方文武搜捕西海會匪先後拿獲匪首揭春亭張藤沙李福汰及夥犯等數十名搜獲拜會三十六欸一紙匪黨名單一紙其在徐聞瓊山之匪正欲前往西海等處合併滋事卽經朱采督飭兵輪管帶官周鎮邦等橫出截擊並飭各營縣分派兵役協力兜拿由合浦縣圍洲墩駛至儋州神山角追及賊船開礮轟擊賊船亦放鎗礮且拒且逃周鎮邦與千總吳廷輝急以輪船截其去路躍登杉板飛棹威之擊斃悍匪四名生擒鄧汝陵等二十一名餘匪泗水而逸淹斃甚多奪獲船二隻礮械多件救出擄禁事主十六名將被劫原船還之據陳良傑周鎮邦各將所獲匪犯解至瓊州由該道鎮等稟經軍批飭訊明嚴辦訊得此次滋事匪徒係屬三股西海會匪一股係揭春亭李福汰張藤沙爲首有大哥二哥紅棍先生草鞋各名目藉拜會惑人糾眾行劫並逼脅良民入會除揭春亭獲後潛逃追拿格斃李福汰狡供避就訊明另辦外已將張藤沙何世平莊亞勉陳晚吳猪仔羅亞生梁亞石王亞保陳亞養龐亞幅歐

亞耀莊亞保楊興益等十三犯審明正法紅江旱洋匪一股係許芝漳王亞四爲首陳亞幅又爲另船之首係老鼠山積匪王亞有發給鎗礮子藥行劫商民燒燬紅江旱蛇頭村民房多間漁船二隻除陳亞幅當場擊斃外已將許芝漳王亞興張良賓鄧亞九鄧亞晚勞三林亞四曾權保李甫光所沛猷等十犯審明正法徐開瓊山海峽匪船一股係鄭汝陵陳亞三爲首另有青崙山匪徒裴亞五吳亞三狗頭山匪徒裴亞高吳運義糾約入夥在洋行劫多次已將鄭汝陵陳亞三馮亞青吳三嫡裴亞五吳運義李佩才黎亞四陳繩倫吳亞五黃亞保黃亞三陳汶柳梁亞木黃亞大譚亞二裴亞萬陳亞廣黃亞二等十九犯審明正法尙有羅香等二十餘名恃無質證堅不吐供應再逐細研訊分別辦理仍設法防緝接濟匪械之王亞有務獲懲辦臣查雷瓊等處會匪洋匪同時蠢動設使捕治稍緩必至互相勾結滋蔓難圖該道鎮等乘其初起分投撲滅擒獲首夥各犯七十餘名所辦甚爲得手經此次大加懲創之後海南一帶均極平靜居民行旅得免戒心其在事各員升於洪濤巨浪之中衝冒鎗礮奮不顧身爲地方除此大害核其勞績實與軍功無異可否仰懇 天恩俯准將參將用補用游擊儘先都司陳巨傑免補都司以游擊仍留兩廣水師儘先補用都司用儘先守備周鎮邦免補守備以都司仍留兩廣水師儘先補用海安營左哨把總儘先千總吳廷輝免補千總以守備儘先補用以示鼓勵出自 逾格鴻慈其餘出力員弁容臣

擇尤另行奏請獎勵斷不敢稍涉冒濫下部議奏○福潤奏本年桃伏汛漲搶護各處險工情形均經前撫臣張曜先後奏報在案奴才接篆正值秋汛喫緊之時連日大雨如注河水漲發在工營委各員紛紛報險當即分飭上下游各總辦竭力搶護一面出駐工次往來河干督飭修守如南岸蒲澤縣之雙合嶺因西北風大作溜勢南趨新蕩挑水壩及魚鱗磨盤各埝迭被搜淘盤陷壽張縣樓新莊頭道壩對岸起灘逼溜南埝埝段亦多蟄落北岸濮州之孫密城管莊趙莊一帶臨黃堤以連朝風雨交加大溜激衝處處出險新舊各埝蟄與水平肥城之傅家岸埝工齊東之梯子壩劉先生莊青城之真武廟沙窩楊家梨行董家石家等莊瀕州南岸之張汪莊老股家蝎子灣沙土魏家進下各處埝段均被溜勢衝刷經承防員弁會同地方官督率勇夫聯絡莊民於狂風驟雨之中實力搶護或添修埝壩或加築後戗始克轉危爲安齊東青城境內及瀕州南岸夾堤均有積水取土維艱辦理情形棘手迭據各總辦稟稱存料無多必須添購濟用而本年防汛經費僅准部撥銀六十萬兩工長欸絀伏汛未過業已告罄奴才籌思至再不得已在於司道各庫酌量挪撥飭令趕緊購料以濟要需邇來天色晴霽河水漸平察看各工漸臻穩固堪以仰慰宸廑下部知之○是月奧大利亞國新簡駐華使臣畢格哩本抵任